

# საბა

№5  
მაისი  
2010

საქართველოს კათოლიკეთა ყოველთვიური მაცნე

**გისაროდენ, მიმადლებულ  
მარიაშ!**



# საქართველო ბოლშევიკი ქვეყანაა?!

ვინ იცის, რატომ დაუთმო ქართული მას-მედიის ზოგიერთმა წარმომადგენელმა ესოდენ დიდი ყურადღება სოფელ არალში მიმდინარე მოვლენებს, თავიდან „რუსთავი 2“-ის, რამდენიმე დღის შემდეგ კი – „იმედის“ ტელევიზიამ (იანვარის მინურულსა და თებერვლის დამდეგს)? თავიანთ რეპორტაჟებში მათ არც იმის გახსენება დავიწყებიათ, რასაც წინა წლებში წერდნენ ჟურნალ-გაზეთები. მათი ყურადღების ცენტრში ერთი მართლმადიდებელი მღვდელი აღმოჩნდა, რომელიც კეთილ საქმეებს აკეთებს, ზოგ შემთხვევაში – სასწაულსაც, რაც გამოიხატება ხეიბარი ბავშვების მიმართ სხვადასხვა აღმზრდელით საქმიანობაში, აღსანიშნავი თავისი ინოვაციური და პოზიციური კუთხითაც. რასაკვირველია, ეს ყველაფერი ყურადღებისა და გამხნევეების ღირსია, თუნდაც იმიტომ, რომ საქართველოში ამ კატეგორიის ადამიანთა მიმართ ორგანიზებული საქმიანობა ფეხს ახლა იკიდებს და, აქედან გამომდინარე, ნამდვილად იმსახურებს ქებას. მაგრამ სინამდვილეში როგორ არის საქმე? ნუთუ სხვა სოფლებსა და ქალაქებში არ იგრძნობა ეს საჭიროება? და თუ ასეა, მაშ, რაღა მაინცა და მაინც ეს სოფელი გამოარჩიეს? ვინ იცის, რას ფიქრობდა არალის მოსახლეობა – ისინი, ვინც თავის ზურგზე იწვინა ამ სოფელში, სწორედ ამ მართლმადიდებელი მღვდლის მიერ წამოწყებული ინიციატივების გამო, კათოლიკე და მართლმადიდებელ ოჯახებს შორის არსებული დაპირისპირება, – ამ რეპორტაჟების ნახვისას და ჟურნალისტებისგან იმ აზრის მოსმენისას, რომ, როგორც იქნა, სოფელში რაღაც კეთდება, რომ თურმე აქამდე არაფერი კეთდებოდა და ბოლოს და ბოლოს, ოთხი საუკუნის შემდეგ, აქ ჩამოვიდა მართლმადიდებელი მღვდელი და ჭეშმარიტი რწმენა მოიტანა.

მათ, ვინც არ იცის, ვეტყვი, რომ არალი ის სოფელია, სადაც ტრადიციულად მრავალი კათოლიკე ოჯახი ცხოვრობდა მანამ, სანამ არ დაიწყეს მართლმადიდებლური პროპაგანდა სწორედ იმ მეთოდების გამოყენებით, რის გამოც კიცხავენ კათოლიკე ეკლესიას... და სოფლის ტრადიციულად კათოლიკე ოჯახებმა მართლმადიდებელ ეკლესიაში არ დაიწყეს სიარული... იმასაც ამბობენ, რომ ისინი თავიანთ თავდაპირველ რწმენას დაუბრუნდნენ, ანდა, ისლამის შემოსევებისგან თავდასაცავად, შეეკრნენ რომის კათოლიკე ეკლესიას, რამდენადაც პოლიტიკური და დიპლომატიური მოტივები ამის საშუალებას იძლეოდა. ცხადია, ეს გასათვალისწინებელი, მაგრამ არადაამაკმაყოფილებელი განმარტებაა, როგორც ისტორიული, ისე სოციალური თვალსაზრისით; ვერავინ დაივიწყებს, და ვერც იმის უცოდინრად მოაჩვენებს თავს (თუკი ოდნავ მაინც აქვს ისტორიის ცოდნაზე პრეტენზია), რომ საქართველოში სახარების ქადაგებისა და ქრისტიანობის გავრცელების პირველივე ეტაპიდან იყო მცდელობა, რომ გაეხატა და შეენარჩუნებინათ კავშირები რომის ეკლესიასთან, იქამდე, რომ იგი თავიანთი ქრისტიანული ისტორიის ნაწილადაც კი აქციეს. აქ ისმის ერთი კითხვა: მაშ, ვინ არიან ის ქართველები, რომლებიც ჭეშმარიტ ქართულ ქრისტიანულ ტრადიციას ინახავენ: ვინც შეინარჩუნა ზიარება რომის ეკლესიასთან, თუ ვინც უარყო ეს

ზიარება? გამოდის, ოთხი საუკუნის წინათ უბრალოდ მიუბრუნდნენ XIII საუკუნემდე არსებულ ტრადიციას, რომელიც შემდეგ დაივიწყეს. არის კიდევ ერთი ფაქტორი: სუფთა ადამიანური კუთხით, რელიგიური არჩევანი იმდენად მნიშვნელოვანია, რომ მას ვერ შევადარებთ რეკლამის, მოდის ან სოციალური შეგნების სახელით ყიდვა-გაყიდვის საგნად ქცეულ რაიმე პროდუქტს. ამიტომაც ამ კონტექსტში კათოლიკურ სოფელზე საუბარი არაკორექტულია, ისევე როგორც საქართველოზე, რუსეთზე... როგორც მართლმადიდებელ ქვეყნებზე, ან თუნდაც იტალიაზე, როგორც კათოლიკე ქვეყანაზე; სწორი იქნებოდა, გვესაუბრა ადგილზე, სადაც ცხოვრობენ სხვადასხვა რწმენის, სხვადასხვა ეკლესიის წარმომადგენლები, მით უფრო დღეს, ამ ცივილიზებულ საზოგადოებაში.

როდესაც უტიფრად აცხადებენ, რომ, ბოლოს და ბოლოს, ოთხი საუკუნის შემდეგ, არალში შევიდა ჭეშმარიტი რწმენა, მაშ, რაღა ვთქვათ ქართველ მართლმადიდებელ ეპისკოპოსებზე, რომლებიც ევროპაში, ინგლისში, ამერიკაში, ან სხვაგან რომ იმყოფებიან? გარდა იმისა, რომ ისინი იმ ქვეყანაში მყოფ ქართველებს ემსახურებიან (და ასეც უნდა იყოს სინამდვილეში), განა მათ არ ჰქონიათ სხვა ეკლესიებისა და სხვა რელიგიების მორწმუნეთა შორის პროზელიტიზმის მცდელობა?

ვინ იცის, რატომ სვამენ ამ კითხვას ის ადამიანები, რომლებსაც კათოლიკურ ქველმოქმედებასთან სურთ დაკავშირება: „კი მაგრამ კათოლიკე უნდა გავხდეთ?“ ან „ხომ არ გააკათოლიკებთ ჩემს შვილს?“ მაინც საიდან იბადება ეს კითხვები და ეს შიში, თუ არა იმ გამუდმებული კიჟინიდან, რომ ქართველი უნდა იყოს მართლმადიდებელი, რომ მხოლოდ ქართულ მართლმადიდებელ ეკლესიას ძალუძს ამ ხალხის გადარჩენა... და არა იმ ჭეშმარიტი ფაქტებიდან, საიდანაც ნამდვილად ჩანს, მისდევს თუ არა კათოლიკე ეკლესია პროზელიტიზმს სხვადასხვა საქველმოქმედო საქმიანობით?

საბოლოოდ, ჩნდება ეჭვი, რომ მთელი ამ რეკლამის უკან დგას დიდი ჩანაფიქრი, რომ საქართველო აქციონ იმ ქვეყნად, სადაც ყველა მისი მოქალაქე იქნება მართლმადიდებელი; და ამის ხორცშესხმას იწყებენ იმ ტრადიციული კუთხიდან, სადაც ჯერ კიდევ შემონახულია კათოლიკური რწმენა. სამწუხაროდ, ამ ცბიერი ჩანაფიქრის ნიშნები თვალშისაცემია: გადანათვლა ჯვრისწერისას, სკოლებში სახელმწიფოსთან მართლმადიდებლობის უზენაესი როლის წარმოჩენა, კონკორდატის მიღება და კათოლიკეთა ეკლესიების მითვისება, ყალბი ან ცილისმამბელოზი ინფორმაციების გავრცელება...

განა არ იცინა, რომ კათოლიკურ თემებში წლების მანძილზე დანერგულია ხეიბრებთან მუშაობის მსგავსი ინიციატივები?

ყოველივე ამის მერე, ისევე დანერგნ, რომ საქართველო ტოლერანტულ ქვეყანაა, და რომ ყველაფერი კეთდება რელიგიური და ეთნიკური უმცირესობების პატივსაცემად!

მამა გაბრიელ ბრაზანტინი

## საფრანგეთის კათოლიკეები ნიქაზის აკრძალვის წინააღმდეგ

გასული წლის 26 იანვარს საფრანგეთის საგანგებო საპარლამენტო კომისიამ წარადგინა მოხსენება კანონპროექტთან დაკავშირებით, რომლის თანახმად მუსლიმ ქალებს უნდა აეკრძალოთ ტრადიციული სამოსის ტარება სახელმწიფო დაწესებულებებში, საავადმყოფოებში, სკოლებსა და უმაღლეს სასწავლებლებში, ასევე, საზოგადოებრივ ტრანსპორტში. გარდა ამისა, საპარლამენტო კომისიის წევრთა აზრით, უცხოელებს, რომლებიც საჯაროდ ატარებენ „რადიკალური რელიგიური“ კუთვნილების სიმბოლოებს, არ შეიძლება პრეტენზია ჰქონდეთ საფრანგეთის მოქალაქეობის მიღებაზე.

ამა წლის 1 თებერვალს, საფრანგეთის კათოლიკე ეპისკოპოსები კანონპროექტის მწვავე კრიტიკით გამოვიდნენ.

ეპისკოპოსმა მიშელ სანტიემ აღნიშნა, რომ საფრანგეთში არც ისე ბევრი ქალი ატარებს ნიქაზს. მისი აზრით, აკრძალვა ნეგატიურ რეაქციას გამოიწვევს მუსლიმურ სამყაროში, რის შედეგადაც გაუარესდება ქრისტიანულ უმცირესობათა მდგომარეობა ისლამურ ქვეყნებში.



იერარქმა ასევე აღნიშნა, რომ მუშაობის ექვსი თვის მანძილზე კომისიას არ ჰქონია კონსულტაციები ქრისტიან და იუდაისტ ლიდერებთან ამ საკითხთან დაკავშირებით. ეპისკოპოსმა მოუწოდა მთავრობას, პატივი სცეს მუსლიმური უმცირესობის უფლებებს: „თუკი გვსურს, რომ ქრისტიანებმა შეძლონ სარგებლობა თავისი უფლებებით ისლამურ ქვეყნებში,

პატივი უნდა ვცეთ ყველა აღმსარებლობის მორწმუნეთა უფლებებს ჩვენს ქვეყანაში“.

სანტიემ ასევე მოუწოდა მთავრობას, განასხვავოს მშვიდობიან მუსლიმთა უმრავლესობა რადიკალურად განწყობილი უმცირესობისაგან.

ამჟამად საფრანგეთში დაახლოებით ორი მილიონი მუსლიმი ცხოვრობს. ქვეყნის შინაგან საქმეთა სამინისტროს მონაცემებით, ნიქაზს მხოლოდ 2000 მუსლიმი ქალი ატარებს. მიუხედავად ამისა, მუსლიმ ქალთა ამ ტრადიციული სამოსის აკრძალვა რამდენიმე წლის მანძილზე გაცხარებული კამათის მიზეზია. დებატები 2004 წელს დაიწყო, როდესაც საფრანგეთის სკოლებში ნიქაზის ტარება საკანონმდებლო დონეზე აიკრძალა. ახალი კანონის მიღების შემთხვევაში, მუსლიმ ქალებს ან უარის თქმა მოუწევთ ამ სამოსზე, ან, კანონის დაუმორჩილებლობის შემთხვევაში, ჯარიმის გადახდა 750 ევროს ოდენობით.

## ვატიკანის მასმედიის საშუალებათა მუშაობა არაეფექტურია

ებერჰარდ ფონ ჰეიმინგენი, ვატიკანის რადიოს გერმანული განყოფილების ყოფილი მთავარი რედაქტორი მიიჩნევს, რომ აუცილებელია ცენტრალური ორგანოს დაარსება, რომელიც პასუხისმგებელი იქნება ვატიკანის მასმედიის საშუალებათა მუშაობაზე.

ებერჰარდ ფონ ჰეიმინგენი ვატიკანის რადიოში 27 წლის მანძილზე მუშაობდა. გერმანული განყოფილების მთავარი რედაქტორის თანამდებობა მან გასული წლის ოქტომბერში

დატოვა. ფონ ჰეიმინგენის აზრით, ვატიკანის მასმედიის საშუალებათა მუშაობა „არაეფექტური და არაპროფესიონალურია“. ისინი დაწვრილებით აშუქებენ მეორეხარისხოვან თემებს და საზოგადოებაში მცდარ შეხედულებას ქმნიან კათოლიკე ეკლესიაზე. იქმნება შთაბეჭდილება, თითქოს ეკლესიის მთავარი საზრუნავია დიალოგი ლეფერისტებთან, ლათინური მესა და პრეზერვატივების აკრძალვა. სინამდვილეში კი პაპს უფრო მნიშვნელოვანი საკითხები აწუხებს: ღმრთის მყოფობის პრობლემა თანამედროვე სამყაროში, ეკლესიისა და სახელმწიფოს ურთიერთდამოკიდებულება, სიცოცხლის დაცვა და დიალოგი რელიგიათა შორის. სწორედ ეს საკითხები უნდა განიხილებოდეს უფრო ფართოდ მასმედიის საშუალებათა მიერ.



## სასულიერო პირები თანასწორობის შესახებ კანონპროექტს აკრიტიკებენ

უწმიდესმა პაპმა ინგლისისა და უელსის ეპისკოპოსებს მოუწოდა, გააგრძელონ ბრძოლა თანასწორობის შესახებ კანონპროექტის წინააღმდეგ. თავის სიტყვაში ეპისკოპოსთა დელეგაციისადმი მან აღნიშნა: ცნობილია, რომ დიდი ბრიტანეთი ცდილობს, „თავისი პოზიციით, უზრუნველყოს საზოგადოების ყველა წევრის თანასწორობა. თუმცა, შედეგად ზოგიერთი საკანონმდებლო აქტისა, რომელიც ამ პრობლემის გადაწყვეტას უნდა ემსახურებოდეს, შეიძლება მივიღოთ გაუმართლებელი შეზღუდვები, რომლებიც დაეკისრება რელიგიურ გაერთიანებებს და წინააღმდეგობაში შევა მათ აღმსარებლობასთან“.

კანონპროექტი 2008 წელს თემთა პალატაში ლეიბორისტული ფრაქციის ლიდერმა, ჰერიეტ ჰარმანმა წარადგინა. თუკი პარლამენტი ამ კანონს დაამტკიცებს, ინგლისისა და უელსის სასულიერო პირები იძულებულნი იქნებიან, სამუშაოდ მიიღონ არატრადიციული სექსუალური ორიენტაციის წარმომადგენლები და, ამრიგად, საკუთარი რწმენის წინააღმდეგ წავიდნენ. წინააღმდეგ შემთხვევაში, მათ სასჯელი დაეკისრებათ დისკრიმინაციისათვის.

ბენედიქტე XVI-ის სიტყვებმა ბრიტანეთის მთავრობისა და სამართალდამცავი ორგანიზაციების წარმომადგენელთა მწვავე რეაქცია გამოიწვია.

ბრიტანეთის ნაციონალური სექულარული საზოგადოების (National Secular Society) წევრებმა განაცხადეს, რომ სხვა ქვეყნის პოლიტიკაში ჩარევა „არადემოკრატიულია“. „ბრიტანელები 20 მილიონ გირვანქა სტერლინგს დახარჯავენ, რათა შედგეს პაპის ვიზიტი – ვიზიტი, რომლის დროსაც იგი გააკრიტიკებს თანასწორობას და განადიდებს დისკრიმინაციას“, – განაცხადა საზოგადოების პრეზიდენტმა ტერი სანდერსონმა.

„რელიგიურმა ლიდერებმა უნდა აღმოფხვრან უთანასწორობა და არა მარადჰყონ იგი. დიდი ბრიტანეთის გეგმების კრიტიკის მაგივრად, რომის პაპმა იმაზე უნდა იზრუნოს, რომ ევროკავშირის კანონმდებლობამ სათანადოდ იმუშაოს ვატიკანში“, – განაცხადა დიდი ბრიტანეთის წარმომადგენელმა ევროპარლამენტში სტივენ ჰიუზმა.

თანასწორობის საკითხთა სამთავრობო სააგენტოს წარმომადგენელი უფრო ფრთხილი იყო თავის გამონათქვამებში, თუმცა იმაზეც მიუთითა, რომ დიდი ბრიტანეთი განაგრძობს თანასწორუფლებიანი საზოგადოების შექმნის

პოლიტიკას: „ჩვენ არასდროს გვითქვამს, რომ ანტიდისკრიმინაციული ნორმების დაცვა სავალდებულოა, როცა საუბარია რელიგიურ წოდებებზე, როგორცაა ვიკარიუსი, მღვდელი, იმამი ან რაზინი. რელიგიური ორგანიზაციები თავად წყვეტენ, როგორ მოიქცნენ ამ შემთხვევაში. თუმცა, ყველა არარელიგიური ორგანიზაცია ვალდებული იქნება, დაემორჩილოს ამ კანონს“.

„პაპის სიტყვები გამოხმაურებას ჰპოვებს მათში, ვინც წინააღმდეგობებს ხედავს ამ კანონპროექტში, – აღნიშნა ვესტმინსტერის მთავარეპისკოპოსმა ვინსენტ ნიკოლსმა, – რელიგიური შეხედულებები და საქმიანობა პრივატული სფეროა. პაპს სურდა, რელიგიურ გაერთიანებათა თავისუფლების უსამართლო შეზღუდვისთვის მიექცია ყურადღება. იგი არ ერევა პოლიტიკაში, მაგრამ სურს, რომ მისი აზრი, რომელიც ქრისტიანულ მემკვიდრეობას ეფუძნება, სხვებმაც მოისმინონ“.

იორკის მთავარეპისკოპოსის ჯონ სენტამუს აზრით, ტოლერანტობის სახელით ქვეყნის მთავრობა ცდილობს, განდევნოს რელიგია საზოგადოებრივი ცხოვრებიდან და მორწმუნეები გეტოში გამოამწყვდიოს. იგი აღნიშნავს, რომ თუკი ლორდთა პალატა ამ კანონპროექტს მიიღებს, ქრისტიანული ეკლესიები დიდი პრობლემების წინაშე აღმოჩნდებიან.

## კიდევ ერთხელ წართმეული ტაძრების პრობლემის შესახებ



ადამიანის უფლებათა სტრასბურგის სასამართლოს დადგენილებით, რუმინეთის მთავრობა ვალდებულია, გადაუხადოს რუმინეთის ბერძნული წესის კათოლიკეებს კომპენსაცია კომუნისტური რეჟიმის ბატონობის წლებში წართმეული ქონების ასანაზღაურებლად. ბიზანტიური წესის კათოლიკეებს ღმრთისმსახურება 1948 წელს აკრძალა.

კონფისკაციის შემდგომ, ქონება მართლმადიდებელ ეკლესიას გადაეცა. აკრძალვა 1990 წლამდე მოქმედებდა.

სასამართლოში სამბატის სამრევლოს სარჩელი განიხილებოდა. რუმინეთის კანონმდებლობის თანახმად, წართმეული ქონება გამოყენებული უნდა იყოს ორივე აღმსარებლობის მიერ, ფლობისა და საკუთრების საკითხები კი უნდა გადაწყვეტოს კათოლიკურ-მართლმადიდებლური ერთობლივი კომიტეტების მიერ. თუმცა მოსარჩელეთა განცხადებაში ნათქვამია, რომ მართლმადიდებლებმა ისინი არც ტაძარში შეუშვეს, და არც მოლაპარაკებათა გამართვა ისურვეს.

სასამართლოს ვერდიქტის თანახმად, სამბატის სამრევლო დისკრიმინაციას განიცდის ხალისუფლების მხრიდან, რადგან საშუალება არ მიეცა, რუმინეთის სასამართლოში დაემტკიცებინა თავისი უფლება ტაძარზე. ევროპის სასამართლომ ეს ფაქტი ადამიანის უფლებათა კონვენციის დარღვევად მიიჩნია და რუმინეთის მთავრობას მოსარჩლისთვის 23 000 ევროს გადახდა დააკისრა.

ოფიციალური მონაცემებით, დღეს რუმინეთში 645 000 ბერძნული წესის კათოლიკეა. რუმინეთის მოსახლეობის 87% რუმინეთის მართლმადიდებელი ეკლესიის წევრია. მის განკარგულებაში ამჟამად ბერძნული წესის კათოლიკეთა 2000 ტაძარია. 1998 წელს შეიქმნა ერთობლივი მართლმადიდებლურ-კათოლიკური საგანგებო კომისია, რომელსაც საკუთრებაზე დავის საკითხები უნდა გადაეწყვიტა. თუმცა ამ დრომდე უნიატებს მხოლოდ 160 ტაძარი დაუბრუნდათ.

რუსული კულტურის დღეები ვატიკანში

სააგენტო „ინტერფაქს რელიგია“ იტყობინება, რომ უახლოეს მომავალში ვატიკანში რუსული მართლმადიდებლობისადმი მიძღვნილ ღონისძიებათა სერია გაიმართება. „ახლა მზადდება მოსკოვის საპატრიარქოსა და კათოლიკე ეკლესიის რამდენიმე ერთობლივი პროექტი კულტურის სფეროში. ასე მაგალითად, 2010 წლის გაზაფხულზე ვატიკანში „რუსული სასულიერო კულტურის დღეები“ გაიმართება, – აღნიშნა მოსკოვისა და სრულიად რუსეთის პატრიარქმა კირილემ ჟურნალ „ექსპერტი“ გამოქვეყნებულ სტატიაში. რუსეთის ეკლესიის წინამძღვრის აზრით, ქრისტიანებმა უნდა იპოვონ „ახალი ენა და ახალი გზები ქრისტიანულ ღირებულებათა შესახებ ქადაგებისთვის, მუდამ ცვალებადი სამყაროს თანამედროვე პირობებში, რათა ეს ქადაგება იყოს მოსმენილი და სათანადოდ აღქმული. კულტურა ის სფეროა, სადაც ეკლესიისა და საზოგადოების დიალოგი შეიძლება განსაკუთრებით ეფექტური იყოს. და აქ მე ვხედავ შესაძლებლობას ქრისტიანთა ნაყოფიერი თანამშრომლობისა ტრადიციულ ღირებულებათა შენარჩუნებისათვის“. პატრიარქმა ასევე აღნიშნა, რომ, პირველ რიგში, მხედველობაში აქვს რომის კათოლიკე და მართლმადიდებელი ეკლესიების თანამშრომლობა, რადგან მათ „ერთნაირი შეხედულება აქვთ სოციალური და ეკონომიკური ეთიკის, ბიოეთიკის, ოჯახის, პიროვნული ზნეობისა და სხვა აქტუალურ პრობლემებზე“.

## მსოფლიოს ათი საუკეთესო ალბომი ნმიდა საყდრის პერსია

კათოლიკე ეკლესია აგრძელებს პოპ-კულტურის ათვი-სებას. ვატიკანის მასმედიის საშუალებებში ხშირად შეხვედებით რეცენზიებს – დადებითს თუ უარყოფითს – პოპულარულ ფილმებზე, ნიგნებზე, მუსიკალურ ალბომებზე. ახლა კი გაზეთმა „L'osservatore Romano“ გამოაქვეყნა ათი საუკეთესო მუსიკალური ალბომის სია, რომელსაც თავადვე „ნახევრად სერიოზულს“ უწოდებს, მაგრამ იმედს გამოთქვამს, რომ იგი უჩვენებს მკითხველს „გზას კარგი მუსიკისაკენ“.



სია ქრონოლოგიური პრინციპითაა შედგენილი და, რა თქმა უნდა, საკმაოდ კონსერვატიულია:

1. The Beatles — „Revolver“;
2. David Crosby — „If I Could Only Remember My Name“;
3. Pink Floyd — „The Dark Side of the Moon“;
4. Fleetwood Mac — „Rumours“;
5. Donald Fagen (Steely Dan) — „The Nightfly“;
6. Michael Jackson — „Thriller“;
7. Paul Simon — „Graceland“;
8. U2 — „Achtung Baby“;
9. Oasis — „(What's the story) Morning Glory“;
10. Carlos Santana — „Supernatural“.

მოამზადა რუსუდან ავალიშვილმა

# ნეტარ ხართ თქვენ, დანო, და ნეტარ ხართ თქვენ, ძმანო, რომლებმაც უფალს უძღვენით თავი

2010 წლის 2 თებერვალს, წმ. მარიამის ზეცად აღყვანების თბილისის კათედრალურ ტაძარში საზეიმოდ აღინიშნა ყრმა იესოს ტაძრად მიყვანების - მირქმის დღესასწაული. 2 თებერვალს ასევე, აღინიშნება ღვთივმშენიერთა - ბერ-მონაზონთა დღეც.

2 თებერვალს მსახურების 25 წელი მიულოცეს მონაზვნებს – ტერეზასა და დავიდას.

კათედრალურ ტაძარში მირქმის დღესასწაული იმითაცა იყო გამორჩეული, რომ ამ დღეს საქართველოს კათოლიკური საკრებულოებიდან აკოლიტად აკურთხეს ცხრა საერო პირი, რომლებიც ორი წლის განმავლობაში ემზადებოდნენ მამა პიერ დიუმულენისა და მამა გაბრიელე ბრაგანტინის ხელმძღვანელობით.

წმიდა წირვას ეპისკოპოსი ჯუზეპე პაზოტო უძღვებოდა. მას ეხმარებოდნენ ამიერკავკასიაში წმიდა საყდრის დესპანი, მთავარეპისკოპოსი კლავდიო გუჯეროტი და საქართველოში მოღვაწე კათოლიკე მღვდლები. წირვას ესწრებოდნენ სხვადასხვა საბერმონაზვნო ორდენების წარმომადგენლები, რომლებიც საქართველოში ეწვეიან თავიანთ მსახურებას.

გთავაზობთ ეპისკოპოსის ქადაგებას.



ამიერკავკასიის ლათინური წესის კათოლიკეთა სამოციქულო ადმინისტრატორი, ეპისკოპოსი ჯუზეპე პაზოტო

ცხოვრების არსი.

სუორა ტერეზა და სუორა დავიდა, სულიერი ცხოვრების ამ 25 წლის მანძილზე განა კონკრეტულად არ გიპოვიათ და არ განგიცდიათ სიყვარული? რასაკვირველია,

ძმანო და დანო,

უფალი გვეკითხება: სურს თქვენს შორის ვინმეს ღმრთის სიახლოვეში ცხოვრება? განა შეიძლება, „მე“ ამ ძლიერ და მაცდუნებელ მოწვევას არ ვუპასუხო? ჩვენ კარგად ვიცით, ბედნიერებისა და სიცოცხლის მწველი სურვილი ადამიანურ დნმ-შია (დენემშია) ჩადებული. თუკი ბედნიერი ცხოვრებისკენ ვისწრაფვით, უნდა ვიცოდეთ, რომ ის ღვთის მიერ არის ამოტიფრული ჩვენს არსებაში, გულში, ჯერ კიდევ ჩასახვის წამიდანვე.



– სიყვარული ჯვარიცაა. თქვენ ჩვენგან ითხოვთ, რომ ღმერთს ვუთხრათ მადლობა თქვენზე მონიჭებული წყალობის გამო და ამ თხოვნას სიხარულით გისრულებთ.

თქვენ კი, – რომლებმაც თქვენი ალტეშები განაახლეთ, – ხომ არ გაგიჭირდათ კიდევ ერთხელ გეთქვათ: უფალო, მინდა, რომ მთლიანად შენ გეკუთვნოდე? განა არ იგრძენით სიხარული

დღეს მინდა, განვაცხადო: ნეტარ ხართ თქვენ, დანო, და ნეტარ ხართ თქვენ, ძმანო, რომლებმაც უფალს უძღვენით თავი (დღეს ხომ იმიტომ ვზეიმობთ, რომ მათ თანხმობა განაცხადეს თავიანთი ცხოვრების ღვთისთვის მიძღვნაზე!), რამეთუ თქვენ უკვე თქვით: „მე მსურს ეს“. ნეტარ



ხართ თქვენ, რომლებმაც არ ჩაკალით თქვენში სავსე და ბედნიერი სიცოცხლის – სრული ბედნიერების – სურვილი და მის შესასრულებლად, უზენაესი სიყვარულის გულისთვის, შეუდექით ერთადერთ ურყევ და უმოკლეს გზას: სიყვარულის გზას, რთულ და ნარეკლიან ბილიკს, სრული თავშენიერვისა და დიდსულოვნების ბილიკს. სწორედ ეს არის თქვენი ღვთივმშენიერული

თქვენს გულში ამ სიტყვების წარმოთქმისას?

დიახ, დღეს ყველა მორწმუნე მიხვდება, რომ თქვენი არჩევანი შემდეგს გვასწავლის: ღმერთი ყველამ პირველ ადგილზე უნდა დავაყენოთ. თქვენ, ყველანი, მტკიცე ნიშანი ხართ ჩვენთვის! ეს არის ეკლესიაში ღვთივმშენიერთა ცხოვრების უპირველესი დანიშნულება და ანგარიშს უნდა ვუნევდეთ ამას.



მოდით, დაგუბრუნდეთ დღევანდელ ზეიმს – მირქმას. ეს ძველთაძველი დღესასწაულია, რომელიც, ესპანელი მომლოცველის, ეგერიას სარწმუნო

მონობით, ჯერ კიდევ მეოთხე საუკუნეში აღინიშნებოდა იერუსალიმში. დღემდე ამ დღესასწაულს აღნიშნავს არა მხოლოდ კათოლიკე ეკლესია, არამედ ანგლიკანური და მართლმადიდებლური ეკლესიებიც. ახლახანს წაკითხული სახარების პირველივე გვერდებიდან ვიგებთ ამ ლიტურგიული დღესასწაულის არსს: „ხოლო როცა გასრულდა მათი განწმენდის დღეები მოსეს რჯულის მიხედვით, აიყვანეს იგი იერუსალიმს უფლის წინაშე წარსადგენად“ (ლუკ. 2,22).

იმისათვის რომ ღრმად შევიცნოთ დღევანდელი დღის საღმრთო ხასიათი, თავად ევქარისტიული ლიტურგიის სტრუქტურას უნდა გავეყვით. დღეს ჩვენ ეკლესიაში ცხრა აკოლიტი უნდა ვაკურთხოთ. ეს ჩვენთან პირველი შემთხვევაა, როდესაც დაქორწინებული მამაკაცები აკოლიტები გახდნენ. დღევანდელ ზეიმში ის ხასიათია ჩადებული, რაც ღვთივშენიერულთა ცხოვრებას აკოლიტატთან აკავშირებს, და ეს არის სწორედ „შესანიშნავი“. ძღვენის წარდგენის წუთებში, თქვენ, აკოლიტებმა, თქვენ-თქვენს საკრებულოებში უნდა მოამზადოთ საკურთხეველი და შესანიშნავი ძღვენი.

მაგრამ, გთხოვთ, გამოიჩინოთ სიფრთხილე: როდესაც წირვაზე დგება ძღვენთა წარდგენის ჟამი, ანუ „შესანიშნავი“, პირველი, რასაც ჩვენ ვაკეთებთ, არის არა „შენიშნა“, არამედ ძღვენთა „წარდგენა“. ცელებრანტის მსგავსად, ჩვენ არ წარმოვთქვამთ პურისა და ღვინის შესახებ სიტყვებს: „შემოგწირავთ შენ“, არამედ „წარმოგდგენთ შენ“. მანამდე კი უნდა გაიაზროთ, რომ თქვენს მიერ წარდგენილი ძღვენი არ არის თქვენი საკურთხევა, ის ღვთის წყალობით გვებოძა: „წყალობითა შენითა მივიღეთ პური ესე, ... ღვინო ესე“. ეს მნიშვნელოვანი ასპექტია. ნუ გვეგონება, რომ ჩვენ პირველები ვართ სიყვარულში. იოანე ამბობს: „ჩვენ კი არ შევიყვარეთ ღმერთი, არამედ მან შეგვიყვარა“, „პირველად მან შეგვიყვარა“ (1 იოან. 4,10. 19). ჩვენ ვერაფერს შევწირავდით მას, მისგანვე რომ არ მიგველო მადლი. უფალმა გვიბოძა ეს პური და ეს ღვინო; მანვე გვიბოძა ხელები, რათა წარვუდგინოთ მას ძღვენი; გვიბოძა გული, რათა კვლავ მას მივუძღვნათ ის.

გასწავდით, და არანაირი საკრედიტო ბარათი არ დაგჭირვებიათ. ამიტომაც ვეუბნებით მას: „კურთხეულ ხარ შენ, უფალო, ღმერთო სამყაროსა: შენი წყალობით მივიღეთ ეს პური, ეს ღვინო, ნაყოფი მიწისა და კაცის გარჯისა“. ამ მიზნით ვილოცეთ ნმ. წირვისას, რათა „ჩვენც წარვდგეთ უფლის წინაშე“.

ისევ დავუბრუნდები ევქარისტიული ლიტურგიის სტრუქტურას და აღვნიშნავ, რომ მხოლოდ შესანიშნავის შემდეგ მივდივართ პურისა და ღვინის საკურთხებლად, რომელიც არ არის და არც შეიძლება იყოს ჩვენი ნამოქმედარი, იგი უსათუოდ და ჭეშმარიტად ღვთიური საქმეა. ჩვენ ისლა შეგვიძლია, რომ წარვუდგინოთ მას პური და ღვინო, ქრისტეს ხორცად და სისხლად ქცეული, მაგრამ ჩვენ თავად ვერ ვაკურთხებთ, ვერ განვწმენდთ რაიმეს ან ვინმეს, და ვერც ჩვენს საკუთარ თავს.

იგივე ხდება საღვთო ცხებულებაში: არც ერთ ჩვენგანს არ ძალუძს საკუთარი ცხოვრება თავად გახადოს ღვთისათვის ცხებული, ძირეულად გარდასახოს, რათა ღვთის სამკვიდრო გახდეს. ყველაზე დიდი, რაც ჩვენ შეგვიძლია გავაკეთოთ, ეს არის: წარვუდგინოთ უფალს ჩვენი ფიქრი, ჩვენი ზრახვა, ჩვენი გულისნადები, ჩვენი ძალისხმევა – მოკლედ, მთელი ჩვენი სიცოცხლე, რათა ყოველდღიურად გახდეს უფრო მეტად „ცხებული“, ანუ „კურთხეული“.

ის სიტყვები, რაც ევქარისტიული ლოცვის დროს გაისმის, ყოველ ღვთივშენიერულზე ითქმის: „აიღო პური, განსტეხა და მისცა“. თქვენც ისევე ხართ უფლის მიერ აყვანილი და შეპყრობილი, და ისევე ნაკურთხი, როგორც იყო წმიდა პავლე. თქვენც დანაწევრებული ხართ და ყოველდღიურად ნაწევრდებით, რათა წყალობად ებოძოთ იმ ადამიანებს, ვისაც ემსახურებით. შეწირული ცხოვრება ღვთის სიყვარულის საქმე უფროა, ვიდრე ჩვენი დიდსულოვნებისა.

„ეკუთვნოდე უფალს, ნიშნავს, დაიღვენთო მისი ჩაუქრობელი სიყვარულით, გარდასახო მისი მშვენიერებით: ჩვენი სიმცირე მას მივუძღვენით, ვითარცა ტკბილი სურნელი;... ეკუთვნოდე ქრისტეს, ნიშნავს, ყოველთვის გენთოს გულში სიყვარულის ნაპერწკალი“. ეკუთვნოდე



აჰა, ჩემო ძვირფასო ღვთივშენიერულნო და აკოლიტნო, პირველი ნაბიჯი რწმენის მომლოცველობაში: მადლიერება, სიყვარულის განცდა. განცდა იმისა, რომ რჩეულნი, კურთხეულნი და მოწოდებულნი ხართ. მადლიერებით სავსე გულით და მოწინებით აღიარეთ, რომ სიყვარული იმაზე ადრე მიიღეთ, ვიდრე თქვენ ამაგს

უფალს, ნიშნავს, ემსგავსო „საკმევლის მარცვლებს, რომლებიც საკურთხეველის წინაშე იწვიან“.

და როგორც წირვაზე ხდება, ეს შეწირვა-გარდასახვა გამიზნულია გასაზიარებლად: „რათა ჩვენთვის იქცეს საუკუნო ცხოვრების საკვებად, ... ხსნის სასმისად“. შესანიშნავს იმიტომ კი არ წარვუდგენთ ღმერთს, რომ მას

იგი სჭირდება, არც იმიტომ, რომ გაანადგუროს. როგორც პაპი ბენედიქტე შეგვახსენებს: „ღმერთი არაფერს აკლებს და ყველაფერს აძლევს“. პირიქით, ძღვენს იმიტომ წარვუდგენთ, რომ მისმა სიყვარულმა გარდასახოს ის, და ასე დავამყაროთ მასთან კავშირი. ეს არის ღვთიურ-შენიშნული ცხოვრების გზა: მიიღო და გასცე; ესაა აკოლიტატის არსიც.... თქვენც იღებთ ევქარისტიას, რათა გასცეთ და გაანანილოთ. ეს კი ყველა ქრისტიანის ცხოვრების არსია: ჩვენ გვებოძა სიცოცხლე და უნდა გავცეთ იგი, თუკი გვინდა, წყალობად იქცეს;...თუკი ჩვენთვის შევინახავთ,...იგი უნაყოფოდ მოკვდება,...სამარხი იქნება, სადაც გაიხრწნება.



ვიდრე დავასრულებდე, ნება მიბოძეთ, გამოვხატო ეპისკოპოსის და მთელი ადგილობრივი ეკლესიის მადლიერება თქვენდამი, ჩემო საყვარელო ღვთიურ-შენიშნულ ძმანო და დანო, იმისთვის რომ არსებობთ და ხართ ჩვენს გვერდით; ცხადია, მადლობას იმსახურებთ, რადგანაც თქვენ ძალიან ბევრ და კეთილ საქმეებს აკეთებთ. მაგრამ თქვენს „საქმეებზე“ წინ თქვენი „არსებობაა“, არსებობა-ნიშანი ღვთის სამეფოს უზენაესობისა, ნიშანი ყოველივეზე აღმატებულისა და იმქვეყნიურობაზე მისი ბატონობისა, ნიშანი ყველაზე უსუსური შვილის მიმართ მისი „სისუსტისა“. ღვთიურ-შენიშნულ ცხოვრებაში არსებობა წინ უსწრებს კეთებას, რაც გაჭირვებულთა მიმართ კონკრეტული საქმეებით

სრულდება. თუკი ოდესმე გვექნება ჩაკეტილი მონასტერი, უკეთ გავიგებთ, რამდენად ჭეშმარიტია, რომ „არსებობა“ „კეთებაზე“ წინ დგას.

მადლობას გიძღვნი თქვენც, საყვარელო აკოლიტონო, დაუბრუნდით თქვენს სამრევლოებს, იყავით ნიშანი ზიარებისა და განვლეთ თქვენი ცხოვრება უფლისადმი მიძღვნილ მსახურებაში.

მინდა, საუბარი დავასრულო ღმერთისადმი ძღვენის შეწირვის ლოცვით, რომელიც შთაგონებულია იესოს ტაძრად მიყვანის მსგავსი მოკრძალებული სულით და ზუსტად შეესატყვისება თქვენს ხელახალ წარდგენას მამა ღმერთის წინაშე: „მიიღე უფალო, ჩვენი ძღვენი ამ საიდუმლო შეხვედრაზე, ჩვენს სიღარიბესა და ჩვენს სიღიადეში. ჩვენ შემოგწირავთ მას, რაც შენ თავად გვიბოძე, შენ კი სანაცვლოდ საკუთარ თავს გვიძღვნი. ქრისტეს მიერ უფლისა ჩვენისა, შეწირულ ქალწულთან, მარიამთან, შენსა და ჩვენს დედასთან ერთად. ამენ“.

## სწეულთა დღე წმ. პეტრისა და წმ. პავლე მოციქულთა თბილისის კათოლიკურ ეკლესიაში

როგორც ვიცით, ლურდის ღვთისმშობლის დღესასწაული და მასთან დაკავშირებული სწეულთა დღე 11 თებერვალს აღინიშნება.

ყველასთვის ცნობილია, რა მოხდა 150 წლის წინ საფრანგეთის ერთ პატარა სოფელში და საიდან იღებს სათავეს ეს დღესასწაული, ამიტომ აქ აღარ გავიმეორებ.

ეპისკოპოსის ნებართვით, წმ. პეტრესა და წმ. პავლე მოციქულთა ეკლესიაში სწეულთა დღე, ხუთშაბათის ნაცვლად (11 თებერვალი ხუთშაბათი დღე იყო), კვირას აღინიშნა, რათა უფრო მეტ ავადმყოფს ჰქონოდა შესაძლებლობა ზეთისცხების საიდუმლოში მონაწილეობისა.

წირვა მამა ზიგმუნდ ნეჯვეჯმა აღავლინა. როგორც ყოველთვის, შთამბეჭდავი იყო მამა ივან მარტინის ქადაგება: „ძალიან მნიშვნელოვანია დღევანდელი დღე, იგი ერთხელ კიდევ მოგვაგონებს ჩვენს მოვალეობას, რომ ყველა ქრისტიანის ვალია, იზრუნოს ავადმყოფებზე, რომ „ავადმყოფი ქრისტეს თვალისჩინია“, და ჩვენც ყველაფერი უნდა გავაკეთოთ, რათა შევუმსუბუქოთ მათ მდგომარეობა. სწეულნი ყოველთვის უნდა გრძნობდნენ, რომ ღმერთს ახსოვს და უყვარს ისინი.

დღევანდელი სახარებაც განსაკუთრებულია: „მოვიდნენ, რომ მისთვის მოესმინათ და თავიანთი სწე-

ულებებისგან განკურნებულებიყვნენ – უწმიდური სულით გატანჯულნიც – და იკურნებოდნენ. მთელი ხალხი ცდილობდა, შეხებოდა მას, ვინაიდან მისგან გამოდიოდა ძალა და ყველას კურნავდა“ (ლუკ. 6, 18-19). ეს არის სრულყოფილების გზა. ამ გზის მეშვეობით ღმერთი და კაცი ერთმანეთთან ამყარებენ კავშირს.

ფიქრობენ, რომ ავადმყოფებს ზეთისცხება ეძლევათ სიკვდილის წინ. ეს არასწორია. ავადმყოფს ეშინია, მღვდელი იმიტომ მოვიდა, რომ ვკვდებო. მღვდელი კი იმიტომ მიდის ავადმყოფთან, რომ დაეხმაროს მას გამოჯანსაღებაში. ბოლოს მ. ნინომ მორწმუნეებს განუმარტა, რომ ზეთისცხების საიდუმლო შეუძლიათ მიიღონ მხოლოდ მძიმე ავადმყოფებმა და მოხუცებმა“.

მართალია, უამინდობის გამო ბევრმა მოხუცმა და ავადმყოფმა ვერ შეძლო მოსვლა, მაგრამ ვინც ზეთისცხების საიდუმლო მიიღო, უეჭველია, გამოჯანმრთელების დიდი იმედი ჩაესახა გულში; ისინი დარწმუნებულნი არიან, რომ ქალწული მარიამი შეისმენს მათ ლოცვადგებებს და დაუბრუნებს სულისა და სხეულის სიჯანსაღეს.

ნადია ჩიჭაძე

# როგორი უნდა იყოს მღვდელი?

კატეხიზმომ გვასწავლის, რომ მღვდლობა საეკლესიო საიდუმლოებაა, რომლის წყალობითაც ქრისტეს მიერ მონაფეთათვის მინდობილი მისია გრძელდება ეკლესიაში ჟამთასვლის დასასრულამდე. წლევიანდელი ლიტურგიული წელი მისი უწმიდესობის, პაპ ბენედიქტე XVI-ის მიერ სამღვდლო წლად არის გამოცხადებული. მღვდელმსახური სიხარულის ადამიანია, როგორც წმ. პავლე აცხადებს, “სხვათა სიხარულის ხელშემწყობი”.

საქართველოში, ერთ-ერთ უძველეს ქრისტიანულ ქვეყანაში, მღვდლები იყვნენ ერის სულიერი მამები, ისინი აქტიურ მონაწილეობას იღებდნენ ქვეყნის ცხოვრებაში. მათ შორის გამორჩეული ადგილი ეკავათ კათოლიკე მისიონერებს, რომლებიც, XIII საუკუნიდან მოყოლებული, აქტიურ სასულიერო მოღვაწეობას ეწეოდნენ საქართველოში. ქვეყნის ძნელბედობის ჟამს, ისინი ზრუნავდნენ მოსახლეობის ქრისტიანულ სულიერებაზე, უმსუბუქებდნენ მათ დუხჭირ ცხოვრებას, მკურნალობდნენ, შეჭქონდათ ხალხში განათლება. ცნობილია, რომ მათი მეცადინეობით დასავლეთ საქართველოში მოისპო ჩვილთა მკვლელის, ადამიანებით ვაჭრობის სამარცხვინო სენი, რომელიც ქართულ გენს განადგურებას უქადდა. მისიონერმა მღვდელმსახურებმა აღადგინეს და შეასწორეს საეკლესიო მსახურების ის წესები, რომლებიც, მტერთა განუწყვეტელი შემოსევების გამო, დავიწყებული ან დამახინჯებული იყო. ქართველი ხალხი ენდობოდა და დიდი პატივით ეპყრობოდა მათ.

ევროპულ მისიონერთა კეთილი საქმენი შემდგომში ევროპის კათოლიკურ მონასტრებსა და სასწავლებლებში აღზრდილმა ქართველმა კათოლიკე მღვდლებმა გააგრძელეს. ისინი თავდადებით იღვწოდნენ, რათა სამშობლოში არ ჩამქრალიყო ქრისტიანული სულიერება. რთული იყო მათი მოღვაწეობის პერიოდი, განსაკუთრებით საბჭოურ ხანაში. მათ უღმერთოთა მხრიდან განიცადეს ძალმომრეობა და სისასტიკე, ხშირად მათი სიცოცხლე იფერფლებოდა შავბნელ ძალებთან უთანასწორო ჭიდილში, მაგრამ მათ მიერ გაღებული მსხვერპლი, ღვანლი განამტკიცებდა მორწმუნეთა გულებს, მათი სული კი, საკმევლის კეთილსურნელოვანი ბოლის მსგავსად, ზეცისაკენ მიემართებოდა.

მამა ანსელმომ მღებრიშვილი და მამა გაბრიელ ასლანიშვილი ის მღვდლები არიან, რომელთაც ბათუმელი კათოლიკეები უმადლიან ბათუმში ლათინური წესის კათოლიკური საკრებულოს დაარსებას, ღვთისმშობლის ეკლესიის აშენებას, მორწმუნეთა გამრავლებასა და რწმენის განმტკიცებას.

როგორი უნდა იყოს მღვდელი? ვფიქრობ, მღვდელი უნდა ჰგავდეს მწყემსს, მასავით უნდა ეძებდეს გზაბნეულებს, ცდილობდეს, შეიცნოს თითოეული მათგანი, მოუსმინოს მათ, ძალუძდეს სხვათა, ახლობელთა თუ შორეულთა, მორწმუნეთა თუ ურწმუნოთა სიხარული-სა და ტანჯვის გაზიარება. ის ყოველთვის მზად უნდა იყოს აღსარების მისაღებად, იყოს სიმართლისმოყვარე.

წმ. გასპარე ბერტონის ცხოვრება და მოღვაწეობა მღვდლობის ერთ-ერთი საუკეთესო მაგალითია. ის იყო მღვდელმსახური, რომელმაც ჩვეულებრივი ცხოვრებით იცხოვრა “არაჩვეულებრივად”. ახალგაზრდა დანიელ კამბონს იგი ასე მიმართავს: “არანაირი სინაზე არ უნდა ჰქონდეს მას, ვინც შემოსილია ჯვარცმული იესოთი. მღვდლის სამოსი არ უნდა იყოს ელეგანტური მოსასხამი პირადი კეთილდღეობისათვის“. დონ გასპარეს შთაგონებით, კამბონმა ჩამოაყალიბა კონგრეგაცია და დაიწყო მისიონერული მოღვაწეობა.

ჩვენი მოძღვარი, მამა გაბრიელე ბრაგანტინი ერთ-ერთი იმ მღვდელმსახურთაგანია, რომელმაც მისიონერული მოღვაწეობის სურვილი გამოთქვა და ჩამოვიდა საქართველოში, პოსტსაბჭოურ ქვეყანაში, სადაც 70 წლის მანძილზე თითქმის მთლიანად აკრძალული იყო კათოლიკური ღვთისმსახურება. დასამალი არაა, რომ კათოლიკეების უმრავლესობა ტრადიციული კათოლიკეები ვიყავით, მონათლულნი კათოლიკე მღვდლის მიერ და ვიცოდით ბებია-ბაბუის მიერ ნასწავლი რამდენიმე ლოცვა, ვამაყობდით ჩვენი კათოლიკობით და გვიხაროდა, როდესაც პაპი დღესასწაულებს მშობლიურ ენაზე გვილოცავდა. ჩვენ ვგრძნობდით, რომ არ ვიყავით დავიწყებულნი. ეს მილოცვები ათბობდა ჩვენს გულებს. მამა გაბრიელემ შეგვიძღვა ბათუმელი კათოლიკეები, შეგვასწავლა ჭეშმარიტი სარწმუნოება, ჩამოაყალიბა საკრებულო. იგი შეგვიძღვა ბიბლიის უკიდევანო სივრცეში და დღემდე ამდიდრებს ჩვენს სულებს მასში ჩადებული სიბრძნით. უკვე თხუთმეტი წელია, რაც მამა გაბრიელე დარსა თუ ავდარში ჩამოდის ბათუმში, რადგან აქ ეგულება თავისი სულიერი შვილები. სწორედ მისი კატეხიზაციების საშუალებით ჩამოვყალიბდით მორწმუნე კათოლიკე-ქრისტიანებად. შევიცანით ღვთის სიტყვა, უფლის ჩვენდამი უსაზღვრო სიყვარული, შევიცანით იესო და გულის კარი გავუღეთ მას.

ჩვენს ცნობიერებაში მღვდელი ის მღვდელმსახურია, რომელიც არა მხოლოდ წირვას აღასრულებს და ზიარებას გასცემს, არამედ თითოეული მორწმუნის მეგობარი და დამრიგებელია. იგი გვასწავლის სათნოებას, მეგობრობასა და ქრისტიანულ სიყვარულს, ავადმყოფთა, ლატაკთა და ტანჯულთა თანადგომას, სიმართლისა და სამართლიანობისათვის ბრძოლას და ყოველივე ამას გვასწავლის არა მხოლოდ სიტყვით, არამედ საკუთარი ცხოვრების მაგალითით.

ჩვენ ვლოცულობთ ჩვენი მღვდლებისთვის და ღმერთს შევთხოვთ, რომ სულიწმიდა მუდამ იყოს მათთან.

**თენგიზ პარმაქსიზიშვილი**

*ბათუმი*



საარქივო მასალებიდან

როდესაც ვახტანგ მეფე რუსეთში იმყოფებოდა, მან დეპუტაცია გააგზავნა პოლონეთში მეფესთან და სხვადასხვა საჩუქრებთან ერთად წაიღეს საქართველოში მოღვაწე პატრების მიერ პოლონურ ენაზე დაწერილი წერილი, სადაც პოლონეთის მეფეს სთხოვდნენ საქართველოსთან კავშირის დამყარებას. დიდი მნიშვნელობა უნდა მიეცეს პოლონელ მოგზაურ მოძღვარს, იეზუიტ კრუზინსკის. მან მრავალჯერ ნახა ქართველი ბატონიშვილები საქართველოსა თუ სპარსეთში და ბევრი დარიგებაც მისცა მათ, საქართველოს სასარგებლოდ. ჩამოყალიბდა კათოლიკეთა მტკიცე "ძმობა", რომლებიც საქართველოში მცხოვრებ გაქირავებულ კათოლიკეებს მატერიალურად ეხმარებოდნენ, განსაკუთრებით დევნილობის დროს. ამ დროს გორში რამდენიმე ოჯახი გახდა კათოლიკე. ზუბალაშვილებიც ამ დროს გახდნენ კათოლიკეები. ამ გვარის ერთი წარმომადგენელი გორის პატრებთან აღზრდილა, მნიგნობარი გახდა და ისე გაითქვა სახელი, რომ მეფე ერეკლემ მას ჯეროვანი პატივი მიაგო.

მაშინ ოსები არაფერ სჯულს არ აღიარებდნენ. მათში ქრისტიანობა ძველადვე დაეცა. მათზე ოსმალებს ეჭირათ თვალი. გორის ეკლესიის კათოლიკე პატრები დიდად სწუხდნენ ოსებში ქრისტიანობის აღმოფხვრას და მაჰმადიანობის გავრცელებას. მათ უნდოდათ ოსებში კათოლიკობის გავრცელება. მაგრამ პატრებმა ეს ვერ მოახერხეს, რადგან რომის ტახტი მაშინ შინაური საქმეებით იყო დაკავებული. ოსები დარჩნენ უპატრონოდ. იქ მაჰმადიანობა აღორძინდა, ხოლო ზოგჯერ ოსები თხის თავს სცემდნენ თავვანს. კათოლიკე მამებმა მათთან ას კაცამდე მაინც გააქრისტიანეს და ამათი უდიდესი ნაწილი ცხინვალში გადავიდა საცხოვრებლად. ცხინვალში მყოფ ქართველ კათოლიკეებს რუსეთის მთავრობაც მოესწრო, ამ ცნობებს მცირედ კავკასიის აქტებშიც უკავიათ ადგილი.

თბილისის და გორის პატრებთან მრავალი ქართველი ყმანვილი იქნა აღზრდილი და განვითარებული. მათ შორის ყოფილა ივანე ორბელიანი, დიდი მოყვარული მეცნიერებისა. მან თარგმნა ლათინურიდან "ნიგნი სარწმუნოებისა", სადაც პატივი სცა რომის ეკლესიას და პაპს. პატრებმა აღზარდეს სარიდონ ჩოლოყაშვილი, რომელმაც შემდეგ ქართულ ენაზე თარგმნა "დიდი არითმეტიკა", თავისი ფიგურებით. ამავე დროს ითარგმნა ლათინურიდან "ცის ქმნილების ნიგნი, ვარსკვლავთა, ზოდთა, პლანეტათა, სადაც მრავალი ფიგურა არის დასახული". პაატა ბატონიშვილის აღზრდაც მათ მიეწერება. პატრების დახმარებით თბილისის სომეხ მოქალაქეთა ბევრი შვილი ევროპაში გავიდნენ სასწავლებლად. ზოგმა ხელობა და ცოდნაც შეიძინა. საქართველოში დაბრუნების შემდეგ, მათ ეს ცოდნა თბილისში მოიტანეს. ჩვენ აქ ასეთ პირებს ყველას ვერ დავასახელებთ.

პატრებმა თარგმნეს ნიგნები სამხედრო და სახელოსნო მეცნიერებათა შესახებ, რომლებიც გავრცელდა საქართველოს მნიგნობართა შორის.

საქართველო მე-17 საუკუნის შემდეგ პატრებით გაივსო. თვით ქართველი ალ. ცაგარელიც კი სწერს, რომ პატრები უანგაროდ ასწავლიდნენ ქართველთა შვილებსო. სომეხი ისტორიკოს-არქეოლოგი ალ. ერიცოვი ამბობს: საქართველოში პატრებს დიდი სარგებლობა მოჰქონდათ, ევროპული მეცნიერება მათ შემოიტანეს საქართველოში, ბატონიშვილები და მწერლები ამათი მომზადებული არიანო. თვით პატრებსაც ქართველების სწავლა-განათლება დიდად უნდოდათ. სწორედ პატრებმა გახსნეს რომში ქართული სტამბა და ნიგნების ბეჭდვაც დაიწყეს.

(ნიგნიდან: პატრი ნიკოლა, როგორც ექიმი. მის დროის ქართველ კათოლიკენი საქართველოში. თბილისი. სტამბა ექვთიმე ხელაძისა.)

თქვენი აზრი „საბას“ შესახებ

ერთი ღლე „საბას“ მკითხველებთან

„საბას“ თებერვლის ნომრის გამოსვლის შემდეგ, ახალციხის საკრებულოში შევიკრიბეთ მრევლის წევრები და მოვანყვეთ მისი განხილვა.

როგორც მკითხველებმა აღნიშნეს, ბოლო ხანებში შეიცვალა ჟურნალის დინამიკა, უფრო გალამაზდა მისი თავფურცელი, გარეკანის გვერდები; სურათებიც უფრო მკაფიოა; ეტყობა, რომ ჟურნალის რედაქცია მეტი მონდომებით მუშაობს; სისტემატურად შექმნა წერილები თითოეული საკრებულოს საქმიანობის შესახებ, რის საშუალებითაც ვგებულობთ ყოველი საკრებულოს პრობლემებს. მკითხველთა მონონება დაიმსახურა ახალგაზრდულმა გვერდმა. შეკრებილებმა იმედი გამოთქვეს, რომ მომავალში ჩვენს საკრებულოსაც დაეთმობა გვერდი.

მეტად საინტერესო იყო „საბას“ თებერვლის ნომერში გამოქვეყნებული ნუგზარ ბარდაველიძის სტატია - „საქართველოს სიძლიერე მის მრავალფეროვნებაში“, რომელიც წმ. მარიამის ზეცად აღყვანების თბილისის კათედრალში აღგვიწილი საშობაო ნირვისა და საქართველოს პრეზიდენტის, ბატონ მისხილ სააკაშვილის სტუმრობის შესახებ მოგვითხრობდა.

აღსანიშნავია, რომ მამა გაბრიელ ბრატანტინისა და ბატონ ნუგზარ ბარდაველიძის წერილები ყოველთვის საინტერესო და ბევრისმთქმელია.

ჩვენი საკრებულო ცდილობს, რომ ჟურნალმა ყველა მკითხველამდე მიაღწიოს. ისეთებს, რომლებიც ეკლესიაში ვერ და-

დიან ავადმყოფობისა თუ მოხუცებულობის გამო, სახლში ვანვლით „საბას“ ყოველ ახალ ნომერს. 74 წლის გიორგი მაისურაძემ საუბარში მითხრა: „ძალიან მიყვარს „საბა“. მიუხედავად იმისა, რომ მე კითხვა არ შემიძლია მხედველობის სისუსტის გამო, მაინც თითქმის ყველა წერილის შინაარსი ვიცი, რადგანაც ჩემი მეუღლე მიკითხავს ხოლმე. ვცდილობ, არც ერთი წერილი არ დარჩეს ნაუკითხავი“. ბატონმა გიორგიმ ასევე აღნიშნა, რომ „კარგი იქნება, თუ „საბაში“ ხშირად გამოქვეყნდებოდა წერილები ძირძველ კათოლიკეებზე, მათ ცხოვრებასა და მოღვაწეობაზე, მათზე, რომლებიც თავდაუზოგავად იღვწოდნენ სამშობლოს საკეთილდღეოდ, კათოლიკური რწმენის შესანარჩუნებლად“.

აქტიურმა მკითხველმა ლ. მერაბიშვილმა აღნიშნა, რომ კარგი იქნება, თუ, სხვა გაზეთების მსგავსად, „საბაშიც“ დაეთმობა ადგილი კულინარიას; შ. დიდიმამიშვილის აზრით კი - სპორტს.

ჩვენ, ახალციხის საკრებულოს წევრები, ვეცდებით, რომ დროულად მივანოოდოთ „საბას“ რედაქციას წერილები და სი-ახლები ჩვენი ეკლესიისა და მისი წევრების შესახებ. ასევე ვეცდებით, რომ ჟურნალი დროულად მივიდეს მკითხველამდე. ჩვენ გადავწყვიტეთ, რომ უსასყიდლოდ გადავცეთ ჟურნალი მათ, რომელთაც მისი შექმნა არ შეუძლიათ.

ილზა ზუბაშვილი  
ახალციხე

გაგრძელება. დასაწყისი იხ. «საბა» 2008წ. №II—2010წ. №I

54. იესო ქრისტე გვიცხადებს, რომ «ღმერთი სიყვარულია» (I იოან. 4, 8) და გვასწავლის რომ «ძირითადი რჯული ადამიანური სრულყოფილებისა, და ამდენად სამყაროს გარდაქმნისა, არის სიყვარულის ახალი მცნება. ამგვარად არწმუნებს იგი ყველა იმათ, ვისაც ღმრთაებრივი სიყვარულისა სწამს, რომ სიყვარულის გზა ღიაა ყველა ადამიანისათვის და რომ ძმობის განსახორციელებელი ძალისხმევა არაა ფუჭი».<sup>66</sup> ამგვარი რჯული მოხმობილია განდეს ადამიანურ ურთიერთობათა ყოველგვარი დინამიკის საბოლოო საზომი და წესი. სხვაგვარად რომ ვთქვათ, ეს იგივე ღმრთის საიდუმლოა, სამებისეული საიდუმლო, რომელიც საფუძველს უქმნის პიროვნების, სოციალურობისა და ამსოფლად ადამიანის მოქმედების მნიშვნელობასა და ფასეულობას, იმდენად, რამდენადაც ის გამოეცხადა და ეწილადა კაცობრიობას იესო ქრისტეს მიერ, მის სულში.

55. მსოფლიოს გარდაქმნა ჩვენი დროისთვისაც მთავარ ამოცანად წარმოგვიდგება. ამ მოთხოვნას ეკლესიის სოციალური მოძღვრება სთავაზობს პასუხებს, რომელთანაც ჯამთა ნიშნებს მივყავართ, უპირველეს ყოვლისა, ადამიანთა ურთიერთ სიყვარულში, ღმრთის მზერის ქვეშ, პიროვნულ და სოციალურ დონეზე ცვლილების ყველაზე ძლიერი საშუალების მითითებით ურთიერთ სიყვარული, მართლაც, ღმრთის უსაზღვრო სიყვარულში მონაწილეობით, კაცობრიობის ნამდვილი მიზანია, – ისტორიული და ტრანსცენდენტული. ამიტომაც, «მიწიერი პროგრესი, მიუხედავად იმისა, რომ ის მზრუნველობით უნდა განიხილოს ქრისტეს სასუფეველის ზრდისაგან, დიდი მნიშვნელობისაა ღმრთის სასუფეველისათვის, იმდენად, რამდენადაც ძალუძს წვლილი შეიტანოს ადამიანთა საზოგადოების უკეთ მოწყობაში».<sup>67</sup>

გ) ახალი ცანი და ახალი მიწა

56. ღმრთის დანაპირები და იესო ქრისტეს აღდგომა აღძრავს ქრისტიანებში საფუძვლიან იმედს, რომ ყველა ადამიანური პიროვნებისათვის გამზადებულია ახალი და მარადიული საცხოვრისი, მიწა, რომელზეც მკვიდრობს სამართლიანობა (შდრ. 2 კორ. 5, 1-2; 2 პეტრ. 3, 13): «მაშინ, დამარცხდება სიკვდილი და ღმრთის ძენი აღდგებიან»

66 ვატიკანის II კრება, სამწყ. კონსტ. Gaudium et spes, 38: AAS 58 (1966) 1055-1056.  
67 ვატიკანის II კრება, სამწყ. კონსტ. Gaudium et spes, 39: AAS 58 (1966) 1057.

იქნებიან ქრისტეში, და ის, რაც უძლური და სრწნადი დაითესა შეიმოსება უხრწნელობით; და, დარჩება სიყვარული და მისი ნამოქმედარი, გათავისუფლებულ იქნება ამაოების მონობისაგან მთელი ქმნილება, რომელიც ღმერთმა შექმნა ადამიანისათვის».<sup>68</sup> ეს იმედი, არამხოლოდ არ უნდა ასუსტებდეს, არამედ უნდა უბიძგებდეს ამქვეყნიურ რეალობებთან დაკავშირებულ შრომას.

57. იმგვარი სიკეთენი, როგორებიცაა ადამიანის ღირსება, ძმობა და თავისუფლება, ბუნებისა და ჩვენი შრომის ყველა კეთილი ნაყოფი, მოფენილი დედამიწაზე უფლის სულში და მისი მცნების თანახმად, განწმედილი ყოველი ლაქისაგან, განათლებული და გარდაქმნილი, კეთუნის ჭეშმარიტებისა და სიცოცხლის, სიწმიდისა და მადლის, სამართლიანობის, სიყვარულისა და მშვიდობის სასუფეველს, რომელსაც ქრისტე გადასცემს მამას და სადაც ჩვენ მათ ხელახლა ვპოვებთ მაშინ ყველა სათვის გაიუღერებს ჭეშმარიტების მთელ რიხით, ქრისტეს სიტყვები: «მოდით, მამაჩემის კურთხეულნი, დაიმკვიდრეთ სოფლის დასაბამიდან თქვენთვის გამზადებული სასუფეველი. ვინაიდან მშობიდა და საჭმელი მომეცით, მწყუროდა და მასვით, უცხო ვიყავი და მიმიღეთ, შიშველი ვიყავი და შემოსეთ, სწიული ვიყავი და მომინახულეთ, საპყრობილეში ვიყავი და მომაკითხეთ. [...] ჭეშმარიტად გეუბნებით თქვენ: რაც გაუკეთეთ ერთს ამ ჩემს უმცირეს ძმათაგანს, მე გამიკეთეთ» (მათ 25, 34-36.40).

58. ადამიანური პიროვნების სრული რეალიზება, მიღწეული ქრისტეში სულის ნიჭის წყალობით, მწიფდება ისტორიაში პიროვნების სხვა პიროვნებებთან ურთიერთობის საშუალებით ურთიერთობანი, რომლებიც თავისი მხრივ აღწევს სრულყოფას სამართლიანობასა და მშვიდობაში მსოფლიოს გაუმჯობესებისაკენ მიმართული ძლისხმევის წყალობით ადამიანის მოქმედება ისტორიაში თავის თავად უკვე მნიშვნელოვანი და ეფექტურია სასუფეველის საბოლოო დადგომისათვის, იმ შემთხვევაშიც კი, როცა ეს უკანასკნელი რჩება სრულებით ტრანსცენდენტულ ღმრთის ნიჭად. ამგვარი ქმედება, როცა პატივსა სცემს ამქვეყნიური სინამდვილის ობიექტურ წესრიგს და ნათელფენილია ჭეშმარიტებითა და სიყვარულით, იქცევა იარაღად სამართლიანობისა და მშვიდობის სულ უფრო სავსე და სრული განხორციელებისათვის და აწმყოში გადმოაქვს დაპირებული სასუფეველი.

68 ვატიკანის II კრება, სამწყ. კონსტ. Gaudium et spes, 39: AAS 58 (1966) 1057.

გაგრძელება შემდეგ ნომერში

# არ დავიჩიყოთ საკუთარი ფესვები



მიგრაცია, ემიგრაცია: ეს სიტყვები დღეს, ოცდამეერთე საუკუნეში, აღარავისთვისაა უცხო. ბოლო ხანებში ემიგრაციის თემა სატელევიზიო, საზოგადოებრივი და გლობალური განხილვის საგანდაც იქცა.

რას ნიშნავს სიტყვა „ემიგრანტი“? ემიგრანტი პირდაპირი მნიშვნელობით გულისხმობს კონკრეტულ პიროვნებას ან ოჯახს, რომელიც თავისი სამშობლოდან მოშორებით, სხვა ქვეყანაში ცხოვრობს. ემიგრანტი – ამ სიტყვის განმარტება სხვადასხვანაირადაა შესაძლებელი. ჩემი აზრით, თუ თვალს გადავავლებთ ადამიანის მიწიერ ცხოვრებას, და იმ „ნუთიერ“ მისიას, რომელსაც ადამიანი თავის სიცოცხლეში ახორციელებს დედამიწაზე, ადვილად მივიღებთ პასუხს და უმაღლეს მივხვდებით, რომ ჩვენ, ყველანი, ამ ნუთი-სოფლად მოსულნი, ემიგრანტები ვართ.

მიგრაცია, ემიგრაცია – ეს ახალი მოვლენა როდია! ანუ ერთა, ხალხთა მიმოსვლა ოდითგანვე არსებობდა. ალბათ, პირველი ემიგრანტები იყვნენ ტყვე მონები, რომლებსაც ყიდდნენ უცხო ქვეყნებში.

დღეს, როდესაც ინტერნეტი, ტელე-რადიო, საინფორმაციო თუ სატრანსპორტო საშუალებები თავისი განვითარების პიკს აღწევენ, ადამიანს უფრო უადვილდება გადაადგილება ერთი ქვეყნიდან მეორეში. ხალხთა მიგრაციის მრავალ მიზეზთა შორის მთავარი და ძირითადი მაინც ქვეყანაში არსებული მწვავე სოციალური და პოლიტიკურ-ეკონომიკური მდგომარეობაა.

მაგრამ რა არის მიზეზი საქართველოს მოქალაქეების ასეთი ხშირი მიგრაციისა? ნუთუ საქართველოში მცხოვრები ადამიანები, განურჩევლად ეროვნებისა თუ რელიგიისა, ის ხალხი არ არის, რომელთათვისაც სამშობლოდან შორს ყოფნა დიდი ტკივილისა და აუტანელი ნოსტალგიის ტოლფასია? დიახ, ეს ასეა, ასე იყო და ასეც დარჩება, მაგრამ დღესდღეობით საქართველოდან მისი მოქალაქეების ასეთი მოჭარბებული მიგრაცია ბევრი რამითაა გამოწვეული, უპირველეს ყოვლისა, შიდა გეოპოლიტიკური (იძულებით გადაადგილებული პირები, ანუ ლტოლვილები) და მძიმე ეკონომიკური (უმუშევრობა) პირობების გამო. გარდა ამისა, არსებობს კიდევ სხვა მრავალი მიზეზი: რელიგიური დევნა, უცხოელზე ქორწინება და სხვ.

„სამი შვილი დატოვა დედამ და სამუშაოდ უცხოეთში წავი-დო“, – ამის გაგონება დღეს უკვე აღარავის უკვირს. აქ შეგვიძლია ვისაუბროთ არა მონატრებაზე, ნოსტალგიაზე, არამედ თვითგადარჩენის ინსტიქტზე. მშობლებისთვის იოლი როდია ასეთი გადანყვებილების მიღება, მაგრამ შვილისა და საყვარელი ადამიანების საკეთილდღეოდ თავის განირვა ხომ ყველაზე დიდი სიყვარულია.

სულ მალე სამი წელი შესრულდება, რაც იტალიაში ვცხოვრობ, კერძოდ კი, ვერონაში, მარადიული სიყვარულის ქალაქში. ეს არის ქალაქი თავისი ულამაზესი არქიტექტურით, ისტორიითა და, რაც მთავარია, სტუმართმოყვარე, გულგრილი ხალხით, ქალაქი, სადაც წელიწადის ნებისმიერ დროს არ წყდება ტურისტთა ნაკადი. ერთხელ თუ მაინც მოინახულებ ვერონას, თავს ისე შეგაყვარებს, რომ დაგამახსოვრდება, როგორც შენი პირველი სიყვარული.

ჩემს გარდა, აქ კიდევ არიან ქართველები, სულ ოცდახუთი-ოცდაათი ოჯახი. როგორ გრძნობს თავს ემიგრანტი? საზღვარგარეთ სხვადასხვა მიზე-

ნით მიდიან: ზოგი სასწავლებლად, ზოგი სამუშაოდ, ზოგიც იღბლის საძებნელად.

საკუთარი გამოცდილებიდან ვიტყვოდი, რომ უცხო ქვეყანაში ჩასულ ადამიანს მრავალი პრობლემის გადალახვა უნევს; მათ შორის, სამ მნიშვნელოვან პუნქტს გამოვყოფდი, ესენია: ენის, მენტალიტეტისა და კულტურათა სხვაობით გამოწვეული პრობლემები. არცთუ ისე ადვილია ამ სამი პრობლემის დაძლევა, მაგრამ თუ ამ ყველაფერს გადალახავ, მაშინ ჩათვალე, რომ უკვე მყარად დგახარ უცხო მიწაზე, მაგრამ ეს არაა საკმარისი. არსებობს ყოველდღიური მრავალი საზრუნავი (ბინით უზრუნველყოფა, საბუთების მონესრიგება, სამუშაოს მოძიება). ამიტომ, სანამ გადაწყვეტ ნასვლას შენი ქვეყნიდან, ყველაფერი კარგად უნდა ანონ-დანონო და დარწმუნდე შენი თავის შესაძლებლობებში, ვინაიდან თუ მარტო მიდიხარ, იქ შენ იქნები შენი თავის დედაც, მამაც, ძმაც და დაც; იქ შენ ხარ შენი თავის პატრონი. მრავალმა ემიგრანტმა, თავისი ოჯახითურთ, უცხო ქვეყანაში გზა გაიკვალა, ზოგმა ეს შესაძლებლობა თავისსავე საზიანოდ გამოიყენა და ცუდაც დაასრულა.

მართლაც, უცხო ქვეყანაში ყოფნის პირველ წელს მრავალ სირთულესთან გინევს გამკლავება, თითქოს ახალგვადგმული ბავშვივით ხარ. მაგრამ ეს ყველა ემიგრანტის გასავლელი გზაა. ცხოვრებაში სიძნელეებს ყველგან ხვდები, სადაც არ უნდა იყო, შინ თუ გარეთ, მაგრამ არ არსებობს ისეთი სიძნელე, რომელიც ადამიანის შესაძლებლობებს აღემატება.

დგება მომენტი, როდესაც იტყვი: მორჩა, აღარ შემიძლია, აღარაფერი მემეცლება; არის შემთხვევები, როდესაც ემოციები ჭარბობენ გონებაზე, და ზუსტად მაშინ გმართებს გონების ყველაზე მეტად კონცენტრირება; არის მომენტი, როდესაც იმედს კარგავ და სასონარკვეთილებაში ვარდები, და სწორედ მაშინ გჭირდება რწმენა, რადგან ის გეხმარება მრავალი პრობლემის დაძლევაში.

როგორც ზემოთ მოგახსენეთ, ვერონაში არცთუ ისე ბევრი ქართველი ცხოვრობს, და კიდევ უფრო ცოტანი ვართ ჩვენ, რომლებიც ჯერ კიდევ თბილისის, ან საქართველოს სხვა ქალაქების კათოლიკური ეკლესიებიდან ვიცნობდით ერთმანეთს. მიუხედავად იმისა რომ ყველანი ერთ ქალაქში ვცხოვრობთ, არცთუ ისე ხშირად ვხვდებით ერთმანეთს, დროის უკმარისობისა თუ სხვა მიზეზთა გამო. მაგრამ მაინც ვახერხებთ შეხვედრას, რაც დიდ ზემოდადგომას ხოლმე.

საზღვარგარეთ ცხოვრებისას ძალიან მნიშვნელოვანია, მოახდინო ადაპტაცია, გაეცნო იმ ქვეყნის ხალხთა წეს-ჩვეულებებს, კულტურასა და ცხოვრების სტილს, სადაც იმყოფები, რაც მთავარია, შეიძინო მათი დადებითი თვისებები, გაითვალისწინო უცხოელ მეგობართა რჩევა, იცხოვრო ღირსეულად და პატიოსნად (რასაც იქ დიდი ყურადღება ექცევა). რაც მთავარია, არ დაივიწყო შენი ფესვები, შენი ისტორია და კულტურული ფასეულობები. როგორც ნამდვილ ქართველებს, ყოველთვის უნდა გვახსოვდეს დიდი ილიას სიტყვები: „ენა, მამული, სარწმუნოება“.

ერთი დიდი გამოცდილება, რაც ვერონაში ცხოვრებისას მივიღე, ისაა, რომ რომელ ქვეყანაშიც არ უნდა იმყოფებოდე, მათ მოსახლეობას ვერაფრით გააოცებ, თუ არა შენი კულტურითა და ზრდილობით.

მე დიდი იმედი მაქვს, რომ საქართველო გამთლიანდება, გაბრწყინდება და მას ყველა თავისი შვილი დაუბრუნდება.



მარცხნიდან: ინგა ილურიძე, ნუმრუდ ფამოვი და ლევან შიხაშვილი (ვერონაში)

ლევან შიხაშვილი

# ნინა

# ყაუხჩიშვილი

2010 წლის 4 იანვარს, გამთენიისას, ქ. მილანში გარდაიცვალა ნინა ყაუხჩიშვილი; იგი 1919 წლის 20 აგვისტოს დაიბადა. ამ ქალბატონმა ლამის მთელი ერთი საუკუნე განვლო, რომელიც საშინელი მოვლენებით იყო დატვირთული: საბჭოური რევოლუცია და ნაციზმი. მან მნიშვნელოვანი როლი შეასრულა ქალთა სკაუტიზმში; იყო ფრიად განათლებული, მილანის, ტურინის, ბარის და ბოლოს ბერგამოს უნივერსიტეტების საერთაშორისო აღიარების ენათმცოდნე და ლიტერატორი, რუსული ენის განხრით. ამასთან დაკავშირებით, ვაქვეყნებთ ინტერვიუს, რომელიც მილანის ეპარქიის ყოველთვიურ ჟურნალ „Il segno“-ში გამოქვეყნდა.



წმიდა საყდრის ელჩმა, მთავარეპისკოპოსმა კლავდიო გუჯეროტიმ, 6 იანვრის წირვაზე აუწყა დამსწრეთ მისი გარდაცვალების ფაქტი. მანვე აღნიშნა, რომ იგი „იყო ქალბატონი, რომლის წინაშეც ვალში ვართ, რადგანაც ის ყოველთვის აცხადებდა თავს ქართველ კათოლიკედ. თავისი ხანგრძლივი ცხოვრების მანძილზე, იგი ხშირად ჩამოდიოდა საქართველოში, როგორც შუამავალი წმიდა საყდარსა და საქართველოს პარლამენტს შორის. შესაშური ურთიერთობა ჰქონდა საქართველოს პატრიარქთან, რომელიც, თავის მხრივ, სიყვარულსა და პატივისცემას გამოხატავდა მის მიმართ“.

რედაქცია

### ქალბატონო ნინო, როგორ გაიხსენებთ ოქტომბრის რევოლუციას?

მხოლოდ ჩემი მშობლების ისტორიით. მამაჩემი, მიხეილი, საქართველოში დაიბადა, როდესაც ეს ქვეყანა ჯერ კიდევ თავისუფალი და სუვერენული იყო. პეტერბურგის პოლიტექნიკური ინსტიტუტის სტუდენტმა, დედაჩემი გაიცნო და მასზე დაქორწინდა, დედა იქაური იყო. 1918 წელს იგი ბერლინს გაემგზავრა საქართველოს მთავრობის დავალებით. სწორედ იქ, 1919 წლის 20 აგვისტოს, დავიბადე მე. მამა საქართველოში 1920 წლის ნოემბერში დაბრუნდა. მაგრამ 1921 წლის თებერვალში საქართველო საბჭოთა საოკუპაციო არმიამ დაიპყრო და მამამ შეძლო იტალიის გემზე ასვლა, რომელიც შავი ზღვიდან ბრინდიზში ჩავიდა; იქედან ბერლინში გაემგზავრა, სადაც „სიმენსში“ (Siemens) დაიწყო მუშაობა.

### როგორი იყო თქვენი ბავშვობა ბერლინში, ანუ ჰიტლერის ბერლინში?

ჩვენ ქართველი ემიგრანტების გარემოში ვიზრდებოდით, გერმანელებთან ნაკლები კონტაქტები გვქონდა. მახსოვს, ერთ შაბათს, როდესაც სიმღერის გაკვეთილიდან სახლში ვბრუნდებოდი, მარშით მიმავალ ესესელთა მიერ ოკუპირებულ ქუჩაზე აღმოვჩნდი: მათ სწორედ ამ დღეს ჩაიგდეს ხელში ძალაუფლება,

მაგრამ მე ეს არ ვიცოდი, რადგანაც არანაირი ინფორმაცია არ მქონდა; მეც მაშინვე ნაცისტურ მსვლელობას შევეუერთდი. როდესაც სახლში მივედი, მამაჩემს ჩემი გალახვა უნდოდა იმის გამო, რომ ფაშისტებთან ერთად მარშით ვიარე! ჩვენს უბანში აქტიური და გაბედული კათოლიკეების ერთი ჯგუფი ცხოვრობდა. წინამძღვართან ერთად, ჩვენ ბიბლიის კითხვის წრე ჩამოვაყალიბეთ: პატარა მოჯანყებებს ვგავდით, თანაც თვალშისაცემიც არ იყო ეს საქმიანობა. ასე აქტიურად ვიღებდი მონაწილეობას თხუთმეტიდან ოც წლამდე ასაკის ახალგაზრდულ კათოლიკურ მოძრაობაში, ვიდრე იგი არ დახურეს.

### თქვენ ბერლინში იყავით „ბროლის დამეს...“...

დიახ, და ეს მოგონება დღემდე მანუხებს. 1938 წლის გაზაფხულზე ბერლინის უნივერსიტეტში ჩავაბარე ფილოლოგიის ფაკულტეტზე. უნივერსიტეტში პოლიტიკურ საკითხებზე არ ლაპარაკობდნენ: ერთი თავდაჯერებული ნაცისტი ლექტორი გვყავდა, რომლის კარგი თვისება ის იყო, რომ პოლიტიკაზე სიტყვასაც არ ძრავდა ლექციაზე.

მამაჩემს სურდა, ავტომანქანის მართვის მონაწილე ამელო, რადგან თვითონ არ მართავდა მანქანას. მაშინ ქალაქის ცენტრში წავედი მართვის შემსწავლელთა კურსებზე. სკოლაში დაძაბული ატმოსფერო

დამხვდა. მითხრეს, რომ წინა ღამით – ისტორიაში იგი შევიდა, როგორც „ბროლის ღამე“ – გერმანელებმა ყველა ებრაელის მაღაზიის ვიტრინები ჩაამსხვრიეს და ყველაფერი წაიღეს. მაშინ ბერლინის ერთ-ერთი მთავარი ქუჩისკენ გავემართეთ, რომელიც სავესე იყო ებრაელთა მაღაზიებით; მინებჩამსხვრეულ მაღაზიებში გერმანელები დავინახეთ, რომლებსაც ყველაფერი გაჰქონდათ. მართლაც, საშინელი სანახავი იყო ეს ყოველივე. შორიდან კი ცეცხლმოკიდებული სინაგოგები მოჩანდა. ჩემი ოჯახი ებრაელთა აოხრებაში არ მონაწილეობდა, რის გამოც ერთმა ჩვენმა მეზობელმა ესესელთა წინაშე დაგვასმინა: სულ რამდენიმე დღეში მამაჩემი გესტაპომ აიყვანა. კიდევ კარგი, რომ მისმა სამსახურმა გამოიხსნა. 1939 წლის 25 აგვისტოს მამა მილანში გაემგზავრა, ხოლო 1 სექტემბერს ჰიტლერმა პოლონეთი დაიპყრო. ოჯახის დანარჩენი წევრები 1940 წლის მარტამდე იტალიაში გაემგზავრების მოლოდინში ვიყავით. ამდენად, მე ორგზის ვიყავი მოწმე ომის გამოცხადებისა: 1 სექტემბერს ბერლინში, მეორედ კი მილანში, კავურის მოედანზე, სადაც საკუთარი ყურით მოვისმინე მუსოლინის საუბარი. ორმოციანი წლების მიწურულს, იტალიის მოქალაქეობა მოვითხოვეთ. ჩემმა ძმამ, გიორგიმ, რომელიც ფუჩის კათოლიკურ უნივერსიტეტში დადიოდა, ანდრეოსს მიმართა, მაგრამ მან უარყო ეს თხოვნა. ხოლო ჯუზეპე ლაძატი, პარლამენტის დეპუტატი, სპეციალურად ჩავიდა რომში ჩვენს გამო და, როგორც იქნა, მივალწიეთ იტალიის მოქალაქეობას, ეს კარგი პირობა იყო იმისთვის, რომ ჩემს ძმას, – იგი ექიმი იყო, – სამუშაო მიეღო.

## ნაცისტური გერმანიის შემდეგ, თქვენ მილანშიც ფაშიზმი დაგხვდათ...

ჩემი ძმის წყალობით, დონ ანდრეა გეტი გავიცანი და ვთანამშრომლობდი ოსკართან (ორგანიზაცია, რომელიც ებრაელებს ეხმარებოდა გაქცევასა და დეპორტაციაში). სრულებითაც არ ვიყავით გმირები, უბრალოდ, დახმარების ხელს ვუწვდიდით მათ; ვმონაწილეობდი გუიდეს (Guide) დაარსებაში, სკაუტების ფემინისტური ჯგუფის წარმომადგენლებმა 1945 წლის 5 მაისს პირველი შეხვედრა გავმართეთ და 14 ოქტომბერს აღთქმები დავდეთ. მილანში შედგა ასევე ჩემი აკადემიური კარიერა. ერთი ფრანცისკელი ლექტორის დახმარებით, კათოლიკურ უნივერსიტეტში რუსული ენის სწავლების უფლება მოვიპოვე. მაგრამ ვალიარებ: სრულიად მოუმზადებელი ვიყავი. ოჯახში რუსულად ვსაუბრობდით, მაგრამ იძულებული გავხდი, პედაგოგიური მოღვაწეობის გამო, შემესწავლა ენა და ლიტერატურა. რუსულ ლიტერატურას ვასწავლიდი ტურინსა და ბარში. 1969 წელს, პროფესორ ბრანკას წყალობით, გავხდი ბერგამოს უნივერსიტეტის ტექნიკური კომიტეტის წევრი. 1968 წლიდან, ჩემი კარი-

რის ბოლომდე, ამ უნივერსიტეტში ვასწავლიდი, ვიყავი უცხო ენათა ფაკულტეტის პრეზიდენტი, დავაარსე სლავური ინსტიტუტი, რომლის 40 წლისთავი სულ რამდენიმე კვირის წინ აღვნიშნეთ.

## თქვენს ესოდენ საინტერესო ცხოვრებაში ჩანს ეკუმენური დიალოგიც...

ჩემი ოჯახის წევრები ლათინური წესის კათოლიკეები იყვნენ. მე არაფერი ვიცოდი მართლმადიდებლობაზე; ამ სამყაროში პავლე ფლორენსკის ნაშრომებმა შემეყვანა და მოხდა ისე, რომ ბოლო წლებში მართლმადიდებლებთან დიალოგს მივმართე, განსაკუთრებით შევისწავლე ქალთა მონაზონობის საკითხი, კერძოდ, დამაინტერესა დედა მარიას ფიგურამ; ქალბატონი, რომელიც, დაუდგრომელი ოჯახური მოვლენების შემდეგ, სასულიერო ცხოვრებას ირჩევს და თავის მონასტერში გაჭირვებულებს ეხმარება, პარიზში, სადაც იგი ცხოვრობდა, გერმანელების ოკუპაციის დროს, ებრაელების მიმართ განუვლი დახმარების გამო, დაიჭირეს და საკონცენტრაციო ბანაკში გადააგზავნეს, სადაც გაზის კამერაში დაიღუპა.

## პენსიაზე გასვლის შემდეგ კი სრულიად ახალ ასპარეზზე გამოჩნდით – სატუსალოში...

სილვანა ჩერუტის წყალობით, – რომელმაც ციხეში



წინა ყაუხჩიშვილი საქართველოში 2009 წელს გამართულ ასურელი მამებისადმი მიძღვნილ კონფერენციაზე (შეხვედრა საპატრიარქოში)

გახსნა პოეზიის სალონი, – მიწვეული ვიყავი პატიმრებთან, რუს პოეტებზე სასაუბროდ. ასე დაიწყო ჩემი სტაბილური თანამშრომლობა მათთან. აქ ბევრი რამ შევისწავლე: პოეზიის მეშვეობით პატიმრები გამოხატავენ პროტესტს, გულლიობას. ერთ-ერთი მათგანი მწერდა: „დრო, რომელიც პოეზიის სალონში გადის, ჩვენთვის სინათლეა“. სიბერის ჟამს ციხეში მუშაობა სრულიად ახალი გამოცდილება იყო ჩემთვის.

მუდამ ვიმეორებ: ყოველთვის ვიყუროთ წინ და არასოდეს უკან.

# წერილი ბათუმის საკრებულოდან

თქვენო მაღალყოვლადუსამღვდელოესობავ, ძვირფასო მამა ჯუზეპე, მაღლობას გიძღვნი იმ წერილსთვის, რომელიც "საბა" დეკემბრის ნომერში დაიბეჭდა. წერილში მოყვანილია ის გულსატკეცილი ფაქტები, რომლებიც კარგა ხანია აშფოთებს საქართველოს კათოლიკეებს - ყოველ საკრებულოს, ყოველ მორწმუნეს. ეს პროცესი გასული საუკუნის 90-იანი წლებიდან დაიწყო და უფრო და უფრო აგრესიულ სახეს ღებულობს. ცალკეული მართლმადიდებელი სასულიერო პირების მიერ (ჩვენ გვიჭირს მათი მღვდლებად მოხსენიება, რადგან მღვდლობა განსაკუთრებული მადლია და ამ მადლის მქონე პირი მორწმუნეთა შორის შუღლის ჩამოგდებას კი არ უნდა ემსახურებოდეს, არამედ ქრისტიანულ სიყვარულს) შეცდომაში შეყვანილმა, ფანატიკურად განწყობილმა ცალკეულმა პირებმა თუ ჯგუფებმა (მაგ., "მართლმადიდებელ მშობელთა კავშირი") ისარგებლეს რა კათოლიკე ეკლესიის შემწყნარებლური პოზიციით, სახელმწიფო და ადმინისტრაციულ ორგანოთა ინერტულობით, თანდათან გააძლიერეს აგრესია სხვა კონფესიის მორწმუნეთა, განსაკუთრებით კი - კათოლიკეთა მიმართ. ისინი ჩამოყალიბდნენ, როგორც სახელმწიფოში სახელმწიფო, რომელსაც არ ეხება საქართველოს კონსტიტუცია, და რომლებიც კანონებზე მაღლა დგანან. ისინი თავს ქრისტიანებს კი აღარ უწოდებენ, არამედ მართლმადიდებლებს, და მათი სახელით (საკითხავია, რომელი სიმართლის მადიდებლების სახელით) აკეთებენ იმას, რაც სურთ და როგორც სურთ. მათ ნინაშე თავს ხრიან სახელმწიფო მოხელეები, ისინი აიძულებენ მოსამართლეებს, მათ სასარგებლოდ გამოიტანონ განაჩენი, ან შეწყვიტონ საქმის განხილვა. შედეგად კი მითვისებულია ჩვენი ეკლესიები, ხელახლა ნათლავენ კათოლიკეებს (რაც, საქართველოს გარდა, არც ერთ მართლმადიდებლურ ქვეყანაში არ ხდება), პრობლემებს უქმნიან კათოლიკე ქრისტიანებს, მათი ოჯახის წევრებს. კათოლიკეებზე ზემოქმედება განსაკუთრებით გახშირდა სამხრეთ საქართველოში. ადგილი აქვს კონსტიტუციით მინიჭებული უფლებების უხემ დარღვევებს. ამ დროს სახელმწიფო მოხელეებს სირაქლეშას პოზიცია უჭირავთ.

როდესაც ბათუმის ღვთისმშობლის კათოლიკური ეკლესია საქართველოს საპატრიარქოს გადასცეს, განგვიცხადეს: „მართლმადიდებელებისა და კათოლიკეების ერთ ტაძარში ლოცვა არ შეიძლება“(!), თუმცა მანამდე გავრწმუნებდნენ, რომ როდესაც ტაძარი გაიხსნებოდა, ჩვენი აღმსარებლობის წარმომადგენლებს შეეძლებოდა იქ წირვის ჩატარება, მათთვის გამოყოფილ დღეებში.

მამა გაბრიელე ბრატანტინის, თავის სტატიაში „რომაული საღამო“ („საბა“ № 12, 2009 წ., გვ. 5), აღწერილი აქვს რომის წმ. ვინსენტისა და წმ. ანასტასიას სახელობის კათოლიკურ ტაძარში მართლმადიდებელ ბერთან შეხვედრა, ტაძარში, სადაც მართლმადიდებლები და კათოლიკეები ერთსა და იმავე საკურთხეველზე აღასრულებენ წირვას. ძვირფასო მეგობრებო, თურმე შესაძლებელი ყოფილა მართლმადიდებელ და კათოლიკე ქრისტიანთა ერთსა და იმავე ტაძარში ლოცვა (ამგვარი შემთხვევის უამრავი მაგალითის მოყვანა შეიძლება). სხვაგან თუ შესაძლებელია ერთად ლოცვა, რა გვიმლის ხელს ჩვენ, ქართველებს, საქვეყნოდ ცნობილ ტოლერანტ ხალხს, რომ ქრისტიანებმა ერთ ტაძარში ერთად ვილოცოთ, თუნდაც ჩვენი-ჩვენი განსხვავებული ტრადიციების მიხედვით?

რამდენჯერ მოვისმინეთ მისი უწმიდესობის, საქართველოს პატრიარქისგან, რომ მართლმადიდებლები და კათოლიკეები ძმები არიან, და რომ განყოფა ბიზანტიასა და რომს შორის პოლიტიკურ ნიადაგზე მოხდა, რომ საქართველო-რომის ურთიერთობაზე ამას გავლენა არ მოუხდენია, რომ ჩვენს შორის დოგმატურ საკითხებშიც ძალიან მცირე განსხვავებაა. როდესაც ამ სიტყვებს ვისმენდით, გვჯეროდა, რომ ეს გულწრფელად იყო ნათქვამი, მით უმეტეს, ვიცოდით, რომ ისტორიულად ეს მართლაც ასე იყო. ეს განცხადებები კეთდებოდა მაშინ, როდესაც საპატრიარქო იკავებდა ჩვენს ეკლესიებს, ჩვენი წინაპრების მიერ დიდი რუფუნებით აგებულ სალოცავებს. განა სწორია, როდესაც მართლმადიდებელი მოძღვრები უკრძალავენ მორწმუნეებს დასავლური ტრადიციებით შესრულებული ხატების, ჯვრების, წმიდანთა გამოსახულებების სახლში დასვენებას, მოუწოდებენ მათი განადგურების, დაწვის, მინაში ჩაფლვისაკენ? რა დავარქვათ ამას?

ჩვენითვის, კათოლიკეებისათვის, არ არსებობს განსხვავება ხატებს შორის. არ არსებობს ორი ქრისტი, ორი ღვთისმშობელი, ერ-

თია მაცხოვარი და ერთია ყოვლადწმიდა ღვთისმშობელი. ყოველი ხატი, იქნება ის აღმოსავლური ტრადიციით შესრულებული თუ დასავლური, ერთნაირად სათაყვანებელი და პატივსაცემია.

როდესაც სახელმწიფოსა და საპატრიარქოს შორის კონკორდატი ფორმდებოდა, სულ სხვა რამეს გვირდებოდა ორივე მხარე. რატომ არ შეასრულეს მათ ეს პირობა? სიცრუის თქმა, დანაპირების შეუსრულებლობა, პირის გატყევა ნუთუ ცოდვა არ არის ღმერთის წინაშე?

ჩვენო მართლმადიდებლო და-ძმანო, რა არის მართლმადიდებლობა? ჩვენი ღრმა რწმენით, ეს მართალი სარწმუნოების, ქრისტეს რწმენის მადიდებლობაა. დასავლური, ანუ ლათინური წესის ქრისტიანები, ასევე, აღმოსავლური წესის ქრისტიანებიც მართალი რწმენის, ქრისტეს რწმენის მადიდებლები არიან. ჩვენ მსოფლიო, საყოველთაო, ანუ კათოლიკე ეკლესიის წევრები ვართ, რომელიც წმ. პეტრემ დააფუძნა, თქვენ კი საქართველოს ეკლესიისა, სადაც წმ. ანდრია, წმ. პეტრეს ძმამ იქადაგა და პირველი ქრისტიანული საკრებულოები დააფუძნა. ჩვენ, ყველანი, ერთი მთლიანი ქრისტეს ეკლესიის წევრები ვართ. კარგად დავფიქრდეთ, ვის სურს ჩვენს შორის შუღლის ჩამოგდება? ვის ემსახურებიან ისინი? განა ქრისტეს რწმენა ამას გვასწავლის? ქრისტე დაყოფსკენ მოგვიწოდებს, თუ ერთიანობისა და სიყვარულისკენ?

ის, რაც დღეს საქართველოში კათოლიკე ეკლესიის მიმართ ხდება, ძალიან ჰგავს იმ პოლიტიკას, რასაც რუსეთის ცარიზმის ჟანდარმერია ახორციელებდა საქართველოს ძალით მიერთების შემდეგ. შეიძლება, ნებით თუ უნებლით, ისინი რუსული სახელმწიფო მანქანის ნების გამოხსატველი არიან.

ცალკეული ჯგუფები მოსახლეობაში ავრცელებენ პაპისა და კათოლიკე ეკლესიის შეურაცხყოფელ ბუკლეტებს. დიას, სამწუხაროა, რაც ამერიკაში მოხდა. ამაზე მისმა უწმიდესობამ, რომის პაპმა საქვეყნოდ განაცხადა და დაგმო იგი. ჩვენი ეკლესია გმობს ყოველივე იმას, რაც ეწინააღმდეგება ქრისტიანულ მორალს და არ ცოდვობს, მიჩქმალოს ის. მაგრამ რა კავშირი აქვს ამას ცელიბატთან? განა აღმოსავლეთში განდევნილები, მეუღლებო ბერები, ეპისკოპოსები იმავე ცელიბატს არ იცავენ? განა დასაძრახია, როდესაც ადამიანი მთელ თავის ცხოვრებას ღმერთის სამსახურს უძღვნის?

ადამიანი უცოდველი არსება არ არის. ხშირად ადამიანები საკუთარ თავლში დიხრეს ვერ ხედავენ და სხვისკენ იმეფენ ხელს. დიას, ძალზე სამწუხაროა, როცა ქრისტიანები ასეთ ცოდვაში ვარდებიან. მაგრამ ამ დროს ნიშნის მოგებით კი არ უნდა ვილაპარაკოთ, არამედ ვილოცოთ, რათა სატანამ ვერ გაიმარჯვოს. ამ ბუკლეტების გამავრცელებლები თუ კარგად გაახელებ თვალს, საკუთარ ეზოში, საკუთარ ეკლესიაშიც საკმაოდ აღმოაჩენენ ასეთ ცოდვილებს. მაგრამ ჩვენ არ ვსაუბრობთ ამაზე ნიშნის მოგებით, პირიქით, სულაც არ გვახარებს ასეთი ფაქტები, რადგან ეს საერთო ტკივილია თითოეული ქრისტიანისათვის. უნდა გვახსოვდეს, რომ, სხვა ცოდვათა შორის, არანაკლებ მძიმე ცოდვაა ცილისწამება.


ჩვენ ვამაყობთ, რომ საქართველოს შვილები და კათოლიკე ეკლესიის წევრები ვართ; ვამაყობთ იმით, რომ ჩვენს წინაპრებს ძლიერი დაუშურებიათ ქრისტიანული რწმენისა და სამშობლოს ძლიერებისათვის; ვამაყობთ, რომ საქართველოში ყოველი მნიშვნელოვანი სიახლის, ქვეყნის კეთილდღეობისათვის გადადგმული ყოველი ნაბიჯის ინიციატორები და ხელშემწყობნი, მართლმადიდებლებთან ერთად, კათოლიკე სასულიერო თუ საერო პირებიც იყვნენ; ვამაყობთ, რომ კათოლიკე ეკლესია ძველთაგანვე მხარში ედგა და დღესაც უდგას ჩვენი ქვეყნის ხალხს, საქართველოს მოსახლეობას; ვამაყობთ, რომ ჩვენი ძვირფასი მოძღვრები, ჩვენი საკრებულოს წევრები ძალ-ღონეს არ იშურებენ, რათა საქართველოში ადამიანთა შორის სიყვარულმა, ურთიერთპატივისცემამ, ქრისტიანულმა თანადგომამ დაისადგუროს. ჩვენს ტაძრებში მუდამ აღვავლებთ ლოცვებს ჩვენი ქვეყნის, ქრისტიანული რწმენისა და ჩვენს ეკლესიებს შორის ურთიერთობის განმტკიცებისათვის.

მოგმართავთ ჩვენი "გადანათლული" და-ძმანო, რომლებიც საკუთარი კეთილდღეობის მიზნით გადაინათლეთ, გვერწმუნეთ, თქვენ გულმოდგინე მართლმადიდებლები ვერ იქნებით, რადგან მტკიცე რწმენა არ გაგაჩნიათ. ეცადეთ, შეიცნოთ ქრისტიანული რწმენის ჭეშმარიტება და მტკიცედ დაიცვათ ის. ჩვენ ვილოცებთ თქვენთვის.

*ბათუმის სულიწმიდის კათოლიკური ეკლესიის მრევლი*

# ჯვარცმყდლი იესოს სკერფები

ცნობილია, რომ იესოს გამოსახულება, არა მხოლოდ მისი სახე, არამედ მთელი მისი სხეული, უკავშირდება წმიდა სუდარას, რომელსაც თაყვანს სცემდნენ ჯერ კიდევ ედესაში, შემდეგ კონსტანტინოპოლში, საფრანგეთში - ლირეიში; დღესდღეობით იგი დაცულია



ტურინში. ყველა მეცნიერი ერთსულოვნად აღნიშნავს, რომ სუდარაზე გამოსახული ადამიანი გარდამოხსნილ იქნა ჯვრიდან უკვე გაშუქებულ მდგომარეობაში. აქედან გამომდინარე, კიდურებმა შეინარჩუნა თავისი მდგომარეობა. სხეულის სუდარაში გახვევამდე, მას გაშუქებული ხელ-ფეხი გაუსწორეს, ხელები კი ერთმანეთზე მაჯებით გადააბეს.

დღეს სუდარაზე შეინიშნება, რომ მარცხენა ფეხი მარჯვენაზე მოკლეა და უფრო უმნიშვნელო ანაბეჭდს ტოვებს ქსოვილზე, განსაკუთრებით მუხლის დონემდე. ეს ფაქტი მიანიშნებს, რომ სიკვდილის მომენტში მარცხენა ფეხი მოხრილი იყო, ხოლო მარჯვენა გასწორებული. ტერფების მდგომარეობა ამტკიცებს ფაქტს: მარცხენა ტერფი შიგნითაა შეწეული მარჯვენასთან მიმართებაში და მხოლოდ ქუსლითაა დაყრდნობილი, ხოლო მარჯვენა ტერფი მთლიანადაა აღბეჭდილი. მეცნიერთა დასკვნა ერთსულოვანია: მარცხენა ტერფი ზემოდან იყო დადებული მარჯვენაზე (პროფესორები:

ბარბეტი, ლეგრანი, ბერნა, რიჩი და სხვ.). ამ მოვლენამ იკონოგრაფიაშიც ჰპოვა ასახვა: ზოგიერთ ბიზანტიურ მონეტაზე ერთ-ერთი ტერფი ძალზედ გადაიდებულია. არსებობდა ქრისტიანული სექტაც, რომელიც თაყვანს სცემდა კოჭლ ქრისტეს!

სუდარის ამ გამოსახულებაზე გაკეთებულმა დასკვნამ ბიძგი მისცა ორი სახის იკონოგრაფიას:


- დასავლური ტიპი, რომელიც ითვალისწინებს იმ ფაქტს, რომ ორი ტერფი ერთმანეთზეა გადადებული და მხოლოდ ერთი ლურსმნითაა დაჭედებული.
- აღმოსავლური ტიპი, რომელიც ზუსტად იღებს იმას, რაც ჩანს სუდარაზე: ორი ფეხი ერთმანეთისგან დაცილებულია და სხვადასხვა მხარესაა მიმართული, მაგრამ ერთი მეორეზე მოკლეა, რაც ხსნის ბიზანტიურ იკონების ფეხსადაგამის დახრილობას.

ორნაირი გამოსახვის ეს სხვადასხვაობა არ ასახავს დოგმატურ განსხვავებას, ეს არის სხვადასხვანაირი



გამოსახვა იმისა, რაც ასახულია სუდარაზე. აღმოსავლეთი სუდარის ზუსტი ასლის მიხედვით გამოსახავს სხეულს ისე, როგორც ის ჩანს საფლაგში, როგორც ის აღდგა, დასავლეთი კი ეხმიანება ჯვარცმის ისტორიულ ფაქტს და გამოსახავს სხეულს ჯვარზე, ერთმანეთზე მილურსმული ტერფებით.

**მამა პიერ დიუმულენი**



# ჰაიტი, 2010 წლის 12 იანვრის მიწისძვრა

მხოლოდ ერთი კვირა გაეწერდა პორტ ოპრენსში, დედაქალაქი შემოვიარე, ყველგან ნანგრევებს ვაწყდებოდი... ნაგებობათა 80% დანგრეულია, ან ჩამონგრევის პირასაა და საცხოვრებლად უვარგისი. ადამიანთა თვალეში ჯერ კიდევ ჩანს 12 იანვრის დამანგრეველი მიწისძვრის შედეგად გადატანილი ძრწოლა: სიკვდილს გადარჩენილები საკუთარი საცხოვრებლის ნანგრევების წინ შეკრებილიყვნენ და თავს აფარებდნენ სხვადასხვა ნაჭრებისა თუ ცელოფნებისაგან შეკონინებულ კარებს, წვიმებისა და დილის უხვი ნამისაგან თავდასაცავად. ბევრმა თავი შეაფარა ნაწილობრივად დანგრეულ სახლებს, რომლებიც, განმეორებითი მრავალჯერადი ბიძგების შედეგად, მოულოდნელად დაინგრა და ადამიანებიც ქვეშ მოიყოლა. ხალხი შეშინებულია, ყველას ღია ცის ქვეშ სძინავს, ადგილობრივი მასმედიის წარმომადგენლები კი ამ შიშს კვებავენ მიწისძვრის შემდგომი ძლიერი ბიძგების შემაფოთლებელი პროგნოზებით. ტრაგედიიდან ერთი თვის შემდეგ, როდესაც დადისარ დანგრეულ ქალაქში, ისეთი შთაბეჭდილება რჩება, თითქოს მიწისძვრა სულ ახალი მომხდარია: ზარალი იმდენად დიდია, რომ აქამდე განეული დახმარებები თითქმის შეუმჩნეველია; გარდა ამისა, სხვადასხვა დამხმარე ჯგუფები უკვე ალაგებენ თავიანთ კარებს და წასასვლელად ემზადებიან, რადგან დახმარების ტალღა ნელდება. ქალაქში მხოლოდ ნანგრევები ჩანს და კვლავ იგრძნობა გვაშინების მძაფრი სუნი. მთელ ქალაქში მხოლოდ ორი ექსკავატორი ვნახე, გარდაცვლილთა უმრავლესობა ჯერ კიდევ ნანგრევების ქვეშაა ჩარჩენილი, სადაც მხოლოდ ძაღლები ახერხებენ შეძრომას მათ დასაგლეჯად. ხალხი მხოლოდ საკუთარი ხელების ამარაა დარჩენილი, რომ ჩამარხული ამოთხაროს, ან დანგრეული ალაგდინოს, მაგრამ აღარ აქვთ ძალა. სახლების გარდა, ნანგრევებადაა ქცეული საავადმყოფოები, სკოლები, ოფისები, მაღაზიები, ბანკები, ასე რომ ადრე არსებული სამუშაოს მცირედი შესაძლებლობაც გაქრა: ჰაიტიში ყველაფერი განადგურდა! მხოლოდ რწმენა დარჩა. ტრაგედიიდან ზუსტად ერთი თვის შემდეგ, ჰაიტელები შეიკრიბნენ ჩვენი მისიის ეკლესიაში და სამი დღე მთელი დედაქალაქის მოედნებზე უფალს ადიდებდნენ, მადლობის მისაგებად მღეროდნენ და ცეკვავდნენ ყველაზე სუფთა და ლამაზ ტანსაცმელში გამოწყობილები, რაც კი იმ დროისათვის მოეპოვებოდათ.



ისინი არ ეკითხებიან ღმერთს, თუ რატომ განირა მან სასიკვდილოდ ამდენი ხალხი, არამედ სვამენ კითხვას, თუ რატომ გადაარჩინა ღმერთმა სწორედ ისინი. გრძნობენ ღვთის სიყვარულს, რაკი გადარჩნენ, და ეს აძლევთ ძალას, რომ ყველაფერი თავიდან დაიწყონ. მე, რაკი ვიცოდი უკვე არსებული მდგომარეობა, ჩავედი იქ ყოველგვარი იმედის გარეშე, მაგრამ პარადოქსია, რომ სწორედ მათ მომცეს მე დიდი იმედი. ჰაიტელებმა აქეთ მანუგემეს!

ჩვენი მისიის შენობამ გაუძლო დარტყმას, მიუხედავად იმისა რომ გაჩნდა ბევრი ბზარი და ყველაფერი შესაკეთებელია. პირველ დღეებში ასობით სხვადასხვა ოპერაციის ჩატარება ვახდა საჭირო, სამედიცინო პერსონალი ქირურგი-

ულ ინსტრუმენტებსა და მედიკამენტებს ეძებდა გახეთქილი მილების შედეგად დატბორილ იატაკზე მიმოყრილ სხვადასხვა აპარატებსა და მოწყობილობებს შორის; სწორედ მაშინ, როდესაც ყოველ წამს სასიცოცხლო მნიშვნელობა ჰქონდა, იტანჯებოდნენ საჭირო ინსტრუმენტების ძებნით. ამჟამად სხვადასხვა მომსახურება უკვე აღდგენილია და ჩვენი საავადმყოფო უბრუნდება სრული სახით ფუნქციონირებას, იტალიიდან გაგზავნილი კონტინენტებიც მალე ჩაალწევს დანიშნულების ადგილამდე. დღესდღეობით ჩვენს სემინარისტებს კარვებში სძინავთ; ხოლო როდესაც შენობაში არიან და ბიძგს იგრძნობენ, მაშინვე გარეთ გარბიან მღუმარედ, შემდეგ კი ბრუნდებიან უკან ცრემლიანი თვალებით: შეძრწუნებულნი იხსენებენ მეგობრებისა და ნაცნობების ყვირილს, რომლებიც დაილუპნენ მათ თვალწინ, რადგან შეუძლებელი იყო ნანგრევების ამოთხრა შიმველი ხელებით.

კომენტარს არ საჭიროებს ის ფაქტი, რომ პორტ ოპრენსში, კამილიელითა კონგრეგაციის უპატრონო ბავშვთა ერთ-ერთი სახლის დირექტორი, დამანგრეველ მიწისძვრამდე რამდენიმე წუთით ადრე, ისე რომ არც იცოდა რატომ, შევარდა შენობაში და ყვიროდა, რომ ყველა ბავშვი სასწრაფოდ გასულიყო გარეთ: შენობა მთლიანად ჩამოინგრა და სამოცი ბავშვი გადარჩა. მისიაში შესაძლებლობა მქონდა, გამეცნო ბევრი გადარჩენილი: ოზიმი, 16 წლის ბიჭი, ამპუტირებული მკლავითა და მარცხენა ფეხით, სიღარიბეში ცხოვრობდა და მისი ერთადერთი ოცნება და შეება იყო ფეხბურთის თამაში. იზაბელი, 14 წლის, დაკარგა ოჯახი და დარჩა მარტო პატარა უილსონთან ერთად, რომელიც მის მიმართ განხორციელებული ძალადობის ნაყოფია. ახლა საკუთარი შვილის ძუძუთი კვებაც არ შეუძლია, რადგან

ფიზიოლოგიურად ძალიან ახალგაზრდაა. ჩვენი ბავშვებიც (foyer bethleme-დან) გადარჩნენ, მათ უვლიან და კვებავენ, მაგრამ მძიმე ცხოვრება აქვთ: მოგიახლოვდებიან, ხელზე ხელს გკიდებენ და ლოყაზე იდებენ, თვალებს ხუჭავენ და ილიმებიან, რადგან წარმოიდგენენ, რომ ეს მათი დედის ხელია. ისინი მხოლოდ იმიტომ მიატოვეს, რომ მათი ხეიბრობა მიჩნეულია ვუდუს წყევლად.

ეს სურათი ჰაიტიში გადავიღე და იქაურობას ასახავს. ახლა ჩემს გონებაში დაჟინებით მეროდება კითხვა: თუკი ის ხალხი თავის თავს ეკითხება, თუ რატომ აკურთხა ისინი ღმერთმა ისე ძლიერად, რომ შეუნარჩუნა სიცოცხლე, მე, ვინც ვცხოვრობ აქ, იტალიაში, რა უნდა ვიფიქრო ჩემს თავზე? არაფერი მრჩება იმის გარდა, რომ შევეუერთდე ჰაიტელების მიერ ღვთის სადიდებლად აღვლენილ ლოცვებს.

**ფრანჩესკო საზია,**  
კამილიელი, 18 თებერვალი, 2010

*P. S. ფრანჩესკო საზია ჰაიტიში სავანებო მისიით იყო მივლენილი. მან ჰაიტელებს ის მცირედი დახმარება ჩაუტანა, რაც საქართველოს კათოლიკეებმა მათთვის შეაგროვეს. ამ კეთილშობილურ საქმეში საქართველოში მოქმედმა ყველა კათოლიკურმა საკრებულომ მიიღო მონაწილეობა.*



# სკანდალი ღარიბი ქვეყნებისთვის შექმნილი ფალსიფიცი- სირაპული წაფლავის გამო

ჯანდაცვის საერთაშორისო ორგანიზაციამ (OMS) საქვეყნოდ ცნობილი გახდა ფალსიფიცირებული წამლების ღარიბი ქვეყნებისათვის მიყიდვის ფაქტები; მაგ: აფრიკაში გაყიდული მალარიის საწინააღმდეგო წამლების 50% ფალსიფიცირებულია, არაოფიციალური წყაროები კი 60%-ს ვარაუდობენ.

ჯანდაცვის საერთაშორისო ორგანიზაცია აცხადებს, რომ აზიის სამხრეთ-აღმოსავლეთ ნაწილში და ლათინურ ამერიკაში მოხმარებული წამლების 30%-ზე მეტი გაყალბებულია. ჯანდაცვის პონტიფიკის სამოციქულო საბჭოს პრეზიდენტმა, მთავარეპისკოპოსმა ზიგმუნდ ჟიმოვსკიმ ამ მძიმე ფაქტებს ფარდა ახადა, 11-14 სექტემბერს, პოლონეთის ქ. პოზნანში გამართულ კათოლიკე ფარმაცევტთა საერთაშორისო ფედერაციის მსოფლიო კონგრესზე, რომლის თემა იყო: „სამედიცინო თავდაცვა: ფარმაცევტთა ეთიკა და სინდისი“.

„წამლების ფალსიფიცირება, – განაცხადა მთავარეპისკოპოსმა თავის გამოსვლაში, – უწინარესად მოზარდი ასაკის ინდივიდებს აყენებს ზიანს. ყალბი ანტიბიოტიკები და ვაქცინები მძიმე ნეგატიურ გავლენას ახდენს მათ ჯანმრთელობაზე. აფრიკაში ბევრი ბავშვი გარდაიცვალა რესპირატორული დაავადებით, მათ შორის, უმრავლესობა – ფალსიფიცირებული ანტიბიოტიკებით. ანტიბიოტიკების დოზირებული გამოყენება, ზოგ შემთხვევაში, იწვევს რეზისტენტული ბაქტერიების სელექციას. რაც შეეხება პრეპარატების შედგენილობას, გამოიყენება ტოქსიკური ნივთიერებები, რამაც შეიძლება ბავშვის სიკვდილი გამოიწვიოს, როგორც ეს მოხდა ჰაიტიზე და ნიგერიაში“.

მსგავსი აღმამოფოთებელი ფაქტებია განხილული პონტიფიკის, ბენედიქტე XVI ის ენციკლიკაში „Caritas in veritate“, სადაც სანდო წამლების საკითხი სანიტარული და ეთიკური აუცილებლობითაა განხილული. ეს უპირველესად ეხება განვითარებად ქვეყნებს. პირველ რიგში, საუბარია სიცოცხლისათვის აუცილებელ წამლებზე. OMS-ის მიერ ჩატარებული კვლევებით, განვითარებადი ქვეყნებისათვის შექმნილი წამლების მეოთხედი ფალსიფიცირებულია. ამ სიტუაციის გათვალისწინებით, მეუფე ჟიმოვსკი ყველას, და განსაკუთრებით კათოლიკე ფარმაცევტებს, მოუწოდებს, რომ: „გაბედულად ამხილონ წამლების გაყალბების და ფალსიფიცირების ყველანაირი ფაქტი და წინ აღუდგნენ მათ დისტრიბუციას“.

შემდეგ მთავარეპისკოპოსმა გაიხსენა იოანე პავლე მეორისა და ბენედიქტე XVI-ის მოსაზრებები კათოლიკე ფარმაცევტების როლის შესახებ სიცოცხლის სამსახურში: ამ

როდეს მისიაში “შეუძლებელია საბაზრო ეკონომიკის, ან კანონმდებლობის საამებლად განუდგე საკუთარ სინდისს“, – აღნიშნავდა პაპი ვოიტილა 1990 წლის 3 ნოემბერს კათოლიკე ფარმაცევტების საერთაშორისო ფედერაციის წინაშე; იოანე პავლე მეორის აზრით, – „კანონიერ და აუცილებელ შემოსავალს ყოველთვის უნდა განაპირობებდეს მორალური კანონის პატივისცემა და ეკლესიის სწავლება“. „კათოლიკე ფარმაცევტებისათვის, – დასძენდა პაპი, – ეკლესიის სწავლება სიცოცხლის და პიროვნების პატივისცემის კუთხით, ადამიანის ჩასახვიდან მის სიკვდილამდე, ეთიკური და მორალური ხასიათისაა. არ შეიძლება სხვადასხვა მოსაზრებები, ან შემთხვევითი არჩევანი ახდენდნენ მათზე ზეგავლენას“.

ასევე, მნიშვნელოვანია ბენედიქტე XVI-ის უწყება, რომელიც პოზნანის კონგრესის მონაწილეებს გაეგზავნა. მთავარეპისკოპოსმა ჟიმოვსკიმ კონგრესის მონაწილეებს შეახსენა ბენედიქტე XVI-ის მიერ 2007 წელს კათოლიკე ფარმაცევტების შეხვედრაზე წარმოქმნილი სიტყვა: “შეუძლებელია გაიყინოს სინდისი, მაგ., იმ პრეპარატების ეფექტებზე, რომელსაც მიზნად აქვს ემბრიონის ნიდაციის შეფერხება, ან პიროვნების სიცოცხლის შემოკლება. ფარმაცევტი ყველა ადამიანს უნდა აცნობდეს კაცობრიობის ოხვრას, რათა ყველა არსება დაცული იყოს ჩასახვის ნუთიდან ბუნებრივ სიკვდილამდე. წამლები ნამდვილად თერაპიულ როლს უნდა ასრულებდნენ“.

მთავარეპისკოპოსმა, სიტყვის დასასრულს, კვლავ გაახსენა პაპი რაცინგერის ორი წლის წინანდელი მონოდება, რათა “სხვადასხვა ფარმაცევტული სტრუქტურები, ლაბორატორიები და საავადმყოფოს კვლევითი ცენტრები, ასევე, ყველა ადამიანი ურთიერთთანადგომას უნდა გამოხატავდნენ თერაპიულ სფეროში, რათა მოსახლეობის ყველა ფენისათვის ხელმისაწვდომი იყოს მკურნალობა და პირველადი აუცილებლობის წამლები, განსაკუთრებით კი ღარიბი ქვეყნის მოსახლეობისთვის. პაპი განსაკუთრებულ ყურადღებას ამახვილებდა ბავშვებზე, რომლებიც „უზმოდ გამოხატავდნენ თავიანთ ტკივილს, რაც ჩვენს სინდისზე უნდა ზემოქმედებდეს“, პირველ რიგში, კი მორწმუნეთა სინდისზე. მამასადამე, “მეცნიერების და, ასევე, ფარმაცევტული საწარმოების მოვალეობაში უნდა შედიოდეს “პრობლემიდან თავის დაღწევის მოძებნა“ ყველასათვის, თუნდაც მსოფლიოს ნებისმიერი კუთხის ყველაზე დატაკისთვის, რომელსაც არ შეუძლია, რაიმე გაიღოს თვითგადარჩენისათვის, იმ პრობლემებიდან თავის დასაღწევად, “რაც პათოლოგიებს და სიცოცხლის რისკს“ უკავშირდება.

## 2009 წელი: სამოცდათერთმეტი მოკლული ქურნალისტი

ნიუ-იორკი, 17.11. 2009 წ.

უკანასკნელი ათწლეული ჟურნალისტებისთვის განსაკუთრებით მწუხარე მოვლენებით გამოირჩეოდა; მთელ მსოფლიოში: სულ სამოცდათერთმეტი მოკლული. ეს ფაქტი გაერო-ს ასამბლეაზე, საანგარიშო მოხსენებაში განაცხადა ჟურნალისტთა დაცვის კომიტეტმა (Committee to Protect Journalist (Cpj)), რომელიც ბეჭდური მედიის თავისუფლებას იცავს. მხოლოდ გასულ წელს, სააგენტო Ansa-ს მონაცემით, მთელ მსოფლიოში თავიანთი პროფესიული საქმის შესრულებისას სამოცდათერთმეტი ჟურნალისტის მკვლელობა აღირიცხა, მათ შორის არის სამი ოპერატორი; ასევე, ოცდახუთი, ჯერ კიდევ გამოუკვლეველი შემთხვევა. „წლების მანძილზე ეს ყველაზე საშინელი წელი იყო“, – გა-

ნაცხადა რობერტ მაჰონიმ, კომიტეტის ვიცედირექტორმა. 2008 წელს ნათელი მოეფინა ორმოცდაორი ჟურნალისტის მკვლელობა.

2000 და 2009 წლებში სულ დაიღუპა 735 ჟურნალისტი. მათ შორის, 238 მოკლეს აზიაში, 202 – ახლო აღმოსავლეთსა და ჩრდილო აფრიკაში, 162 – ამერიკაში, 68 - ევროპაში, 53 – აფრიკის სხვადასხვა ქვეყანაში და 12 – კარიბის კუნძულებზე. ამ მხრივ, პირველობა ერგო ერაყს, სადაც 170 რეპორტიორი ისლამური სექტების ძალადობის მსხვერპლი გახდა, მას მოსდევს ფილიპინები (93) და კოლუმბია (58). ათწლეულის მეორე ნახევარში, მოკლულ ჟურნალისტთა რიცხვი საგრძნობლად გაიზარდა – 40%-ით, რაც იმაზე მიუთუთებს, რომ, სამწუხაროდ, ფენომენი კვლავ იზრდება.



**ბანცხადება**

სულხან-საბა ორბელიანის სახელობის ჰუმანიტარულ მეცნიერებათა უნივერსიტეტი აცხადებს სტუდენტთა მიღებას 2010-2011 სასწავლო წლისათვის, ერთიანი ეროვნული გამოცდების საფუძველზე.

ამჟამად უნივერსიტეტში ფუნქციონირებს ორი ფაკულტეტი: სამართლის და ჰუმანიტარული (თელოგიის მიმართულებით).

უნივერსიტეტმა მორიგი აკრედიტაცია გაიარა 2009 წლის 24 დეკემბერს (გადაწყვეტილება №04-116).

სულხან-საბას უნივერსიტეტი გთავაზობთ საუკეთესო პირობებს კომფორტული სასწავლო გარემოს შესაქმნელად. უნივერსიტეტს აქვს თანამედროვე ტექნოლოგიებით აღჭურვილი შენობა. უნივერსიტეტს აქვს ამიერკავკასიაში უძლიერესი ბიბლიოთეკა თელოგია-ფილოსოფიის სფეროში, ასევე, უახლესი იურიდიული ლიტერატურა.

**სამართლის ფაკულტეტი** გთავაზობთ სამართალმცოდნეობის საბაკალავრო პროგრამას. სტუდენტები გაივლიან პროგრამას, რომელიც ადგილობრივი თუ უცხოური წამყვანი უნივერსიტეტების

გამოცდების საფუძველზე შედგენილი. პროგრამაში საენებისა და მოდულების შერჩევა განპირობებულია იმ უახლესი მოთხოვნებითა და საჭიროებებით, რომელსაც გვიდგენს დასაქმების ბაზარი.

**ჰუმანიტარული ფაკულტეტი** გთავაზობთ თელოგიის საბაკალავრო და სამაგისტრო პროგრამებს. შეისწავლება ქრისტიანული რწმენის საფუძვლები, ძველი და ახალი აღთქმის გადმოცემა, დოგმატური ღვთისმეტყველება, ფილოსოფიური აზროვნების ტრადიციები, ეკლესიისა და ხელოვნების ისტორია.

**რატომ ჩვენთან?**

იმიტომ რომ უნივერსიტეტი გთავაზობთ ფართო შესაძლებლობებსა და თვითრეალიზაციის უნიკალურ შანსს.

**სწავლის საფასური**

- სამართალმცოდნეობის საბაკალავრო პროგრამაზე - 2500;
- თელოგიის საბაკალავრო პროგრამაზე - 1700 ლარი;
- თელოგიის სამაგისტრო პროგრამაზე - 5000 ლარი.

**დასაქმებაში ხელშეწყობა**

- სწავლების თანამედროვე მეთოდები, რომლებსაც წარუძღვებიან დარგის გამოჩენილი ქართველი და უცხოელი სპეციალისტები.
- პრაქტიკაზე ორიენტირებული სასწავლო პროგრამა.
- უცხოურ უნივერსიტეტებთან თანამშრომლობა.

**მისამართი:** თბილისი, გ. აბესაძის ქ. № 6. ტელ.: (99522) 989516;

**ელ. ფოსტა:** info@sabauni.edu.ge


**ბანუსენე მათ, უფალო**



**ლიზა ბალახაშვილი**  
\* 5. 02. 1934 წ. - უდე  
† 6. 02. 2010 წ. - თბილისი



**იბაზა ჩიჭაშვილი**  
\* 10. 04. 1941 წ. - ვალე  
† 27. 01. 2010 წ. - ვალე



**ეგჰარმ ბალახაშვილი**  
\* 1961 წ. - ვალე  
† 19. 01. 2010 წ. - ვალე



**ზაზჰა დალადჯე**  
\* 28.12. 1926 წ. - უდე  
† 9. 01. 2010 წ. - უდე



**ანა ქიჭიშვილი**  
\* 3. 05. 1935 წ. - ხიზაბავრა  
† 21. 01. 2010 წ. - ხიზაბავრა



**განა გოგალიშვილი**  
\* 20.12. 1920წ. ვალე  
† 15.11. 2009 - ვალე



**მარგალიტა კალიაშვილი**  
\* 21. 12. 1934 წ. - ხიზაბავრა  
† 1. 02. 2010 წ. - ხიზაბავრა



**სარა გოგალიშვილი**  
\* 20. 12. 1928 წ. - ხიზაბავრა  
† 28. 01. 2010 წ. - ხიზაბავრა



**თამარ ჩიჭიშვილი**  
\* 15. 03. 1935 წ. - არალი  
† 20. 01. 2010 წ. - არალი

**სარჩევი**

რედაქციის გვერდი .....2  
კათოლიკე ეკლესია  
მსოფლიოში .....3  
კათოლიკე ეკლესია  
საქართველოში .....5  
ჩემი მღვდელი .....8  
საარქივო მასალები .....9  
ეკლესიის სოციალური  
სწავლება ..... 10  
ქართველეთა საზღვარგარეთ ..... 11  
ინტერვიუ .....12  
მკითხველები გვწერენ .....14  
აქტუალური თემა.....15  
ინფორმაცია .....18  
ახალგაზრდული გვერდი .....19  
საგანგებო ჩანართი: ..... I-IV

**რედაქცია:**

მამა გაბრიელე ბრატანტინი  
ნუგზარ ბარდაველიძე  
ნატო ბიგვაკა  
ვერიკო ნოზაძე  
მერაბ ლალანიძე  
ზაზა შათირიშვილი  
ციციანო ხითარიშვილი

**მისამართი:**

თბილისი, გია აბესაძის ქ. №4  
ტელ.: 98-95-16  
რეგისტრაციის № 1853  
დაარსდა 1994 წ.  
მანანა ანდრიაძის მიერ  
© „საბა“, 2010

# ინფორმაცია

## ახალგაზრდებისათვის

### ეს საინტერესოა

ჩვენი ინიციატივები :

- 1 24-27 მარტი  
გეოლოგიური წარმართვა  
შაშა პაატასთან ერთად
- 2 5-7 მაისი  
გუნდის შესწავლა ტრაპიკში  
შაშა შიშასთან ერთად
- 3 8 მაისი  
მუსიკალური ფესტივალი  
ქუთაისში
- 4 14-15 აპრილი  
ახალგაზრდების შესწავლა  
განსაკუთრებით
- 5 9 თებერვალი  
ინტელექტუალური თამაში  
ახალგაზრდებისათვის



**შენ ნახე!  
შენ შეაფასე!  
შენ იაქტიურე!**

# 2010

# წლის

# გეგმა



სამედიკამენტოების ლაიფსტილი წლის  
გათვლილთა სპორტიული  
პროექტებისათვის

ინფორმაციისათვის  
მოგვმართეთ

წინა  
წარმომადგენელს  
საკომპლექსო



აღდგომა პატუშვი



მომლოცველობა ტრაპიზონში



სამძიმარი კოლონელ ხალხს



ქუთაისი



ცეცხი

საფლავების კურთხევა